

# *BAHEBERU, KHAOLO EA*

## *BOHLALO LE EA BOTŠELELA* <sup>1</sup>

¶ ...ea—ea Buka ea Baheberu. Ebe re kena ho ea bo 7, boprista ba Melkisedeke. Ebe rea kena, ho tloha ho boprista ba Melkisedeke, matsatsing a maholo ao a pheko, le ho arola, ho khetholla lipheko. Entano ba khaolong e kholo eo ea tumelo, khaolo ea 11. Le khaolo ea 12, "Ho lahlela kathoko boima bo bong le bong." Le khaolo ea 13, "Lehae leo la Bosafeleng le sa etsoang ka matsoho; empa ke Molimo, a inotsi, ea entseng lehae le leholo lena." Ho babatseha hakakang!

<sup>2</sup> Ke thabetse ho bona khaitseli ea rōna morao mane, ea sa tsoa kena ka tšebeletsong. Ke bona eèna le mohatsa'e. Maobane, ha re nyoloha ka tsela, tulong e itseng e... Ke itse ke tseba lepatsoana ka lefe le lefe le mothinya, kaha ke bile mohlokomeli oa hlaho mona Indiana, 'me ke hlahlobile lilemo tse 'maloa. Ke ne ke tseba tulo efe le efe. Empa maobane nka be ke lahlehile, holimo moo ba neng ba le teng, holima lihlabla, ke tsela e ncha.

<sup>3</sup> 'Me mofumahali keha a tšoeroe ke mofetše matšoafong, eaba Morena o folisa mosali eo ka 'nete. Re ile ra nka... Oh, ntho eohle kamoo e hlahileng, e ne e le ha re lutse mono. Moena Roberson, e ka ba o teng, kajeno. Ke bona mohatsa'e, le Moena Woods, ea leng teng kahare. Re le holimo mono ka hara teraka ea khale, 'na le Moena Roberson, le Moena Woods. Eaba re fumana teraka ena, ra nyolohela mono, hlorong ea leralla. Eaba teng mono Morena o bontša mofetše ka 'nete. Eaba re eme mono re o shebeletse o nyamela ho mosali. Ka mahlo a rōna ka sebele, re eme re o shebeletse o nyamela ho mosali. Eaba o boela a letsetsa mohats'a Moena Woods; 'me a ntse a mpolella, a ntse a tšoela nyee e ntšo eo. 'Me ke enoa hoseng hona, o boetse o lutse ka kerekeng, eèna le mohatsa'e ea ratehang, ba nyakaletse Moreneng. Na ha A babatsehe? [Phutheho e re, "Amen."—Mong.]

<sup>4</sup> 'Me ha kea tseba ha... Mona, ka tloaelo, bathong ba tikoloho, lipono li hlaho ka seoelo mona. Lena ke lehae la heso. 'Me, ke bolela, kahara kereke.

<sup>5</sup> Sontaha, vekeng, re... Ba bakae ba boneng monna ea setulong sa bakuli? Lifofu, liritsa, ba sa tsitsang, le methapo ea kelello e putlame, 'me ba tetsoe ke ba ha Mayo. 'Me—'me o ne a rometsoe mona ke motsoalle oa ka oa ngaka e itseng ea Katolike. 'Me le pele ke tla tšebeletsong, Morena a mpontša pono ea monna eo. Bohle le tseba seo. 'Me monna a folisoa hona mono, ka HO RIALO MORENA. Ua bona? Le ho ema,

a tsamaea a etsoa, a thonaka setulo sa hae sa bakuli, a bona joaloka uena kapa 'na. A tsoa mohahong a sututsa setulo sa hae, ka tloaelo. 'Me mothapo oa teka-takano... U a tseba, ha u khone ho itsitsisa. Ua bona, u mpa feela u sa khone. 'Me e etsahetse ka lilemo.

<sup>6</sup> 'Me maobane ha ke fihla mono, mofumahatsana eo o mpone ka toro ke kena, e ka ba hora ea bobeli feela, 'me ka mo tlaleha a "tšoere ke mofetše," 'me hape ka, "HO RIALO MORENA, 'o ne a folile.'" 'Me—'me eaba o a phaphama, 'me keha e le hora ea bobeli hantle feela. 'Me Moea oa Morena oa theoha, 'me mono toro eo—eo a e lorileng, Morena a e koaholla. Eaba o folisoa hantle hona mono, hantle mono re ntse re talimile. Ho babatseha hakakang!

<sup>7</sup> Ha ke hopole lebitso la hae. Ke mang? Lebitso la hao u mang, khaitseli? Walton, Khaitseli Walton, ea lutseng morao mane. Na u ka ema feela, Khaitseli Walton? Ke batla ho u botsa kamoo u ikutloang kateng. [Khaitseli Walton o re, "Ho hlile ho a babatseha."—Mong.] Amen. Ke botle, ho hotle ho lokile. O motle haholo, ho re sitsa ka mokhoa oo. Ka baka leo re lebeletse tse khaphatsehang, tse tlolisang, tsa tekano e kholo ea Molimo.

<sup>8</sup> Ngaka e ne e mo patetse sena. O 'moleletse "a hema ka lehlakore le le leng feela." Seo e beng e le sona, mofetše o ne o holile o parotse 'me o khaola phefumoloho e ka letšoafong leo, u a bona. Ha u khone ho bona mofetše ka ekeserei, hobane mofetše ke sele, boona, 'me ke—ke bophelo. 'Me u... U mpa feela—u mpa u bonaletska ka nqane ho mofetše, ka ekeserei. Ha u khone ho o bona.

<sup>9</sup> 'Me, empa ruri Morena o... Re ne re eme mono 'me re o talimile, ka borōna, ka mahlo a rōna. Ho o bona o sutha, ho o bona o nyamela, ka mahlo a rōna. Ka baka leo, re lebohela hoo.

<sup>10</sup> 'Me joale, le re rapelle, vekeng ena, re sa tsamaile. 'Me Moena Neville a ka tšoha a e nka ho tloha moo ke qeteletseng teng, tšebeletsong ea Laboraro bosiu. Le se ke la e fosa joale, lehlaahlala le leholo lena la Buka ea Tšenolo.

<sup>11</sup> 'Me ke tseba ho hlasisitsoe thapelo e ngata, 'me re—re tseba Molimo o arabela thapelo. Empa rōna, hoseng hona, re batla ho hlasisa thapeloana pele re bala Buka. Joale, mang le mang ea khonang, a ka bala Buka ka mokhoa *ona*, kapa a ka e phetla ka mokhoa *ona*. Empa ho qosa Molimo, a inotši, ho bula kutloisiso, kaha E le Oona feela O ka e khonang.

Ka baka leo a re inamiseng lihlooho tsa rōna nakoana feela.

<sup>12</sup> Joale, Ntate, ka Lebitso la Mora oa Hao ea ratoang, Morena Jesu, re tla joale re ikokobetsa re ithoba ka hlompho, re le bahlanka ba Hao, hore U tle u bue ka rōna. Bolotsa melomo e buang le litsebe tse utloang, hore Lentsoe le tle le boleloe ke Molimo le ho utluoa ke Moea, ka ho batho. Aba

sena, Ntate. Ere A nke Lentsoe la Molimo a re sebeletse ho latela hloko ea rōna, hoba re e kopa ka Lebitso la Hae le bakeng sa tlotsi ea Hae. Amen.

<sup>13</sup> Joale, palong ea hoseng hona, re ntse re hlahloba. Ha re—re rere; re mpa re hlahloba Buka ena ea Baheberu. Ba bakae ba nafeloang ke eona? Oh, re kene monyakeng! 'Me joale re hlahlobisisa ka hloko, Lengolo holima Lengolo. E tšoanetse joalo... Ntho eohle, Bibebe eohle e tlamahana 'moho. Ha ho Lentsoe le fapohileng malulo a Lona, haeba e le Moea o Halalelang o Le hlomamisang.

<sup>14</sup> Joale, motho o itse, "Bibebe e a Itšoantša." Ke batla ho e bona. Ke botsitse, ka lilemo tse mashome a mabeli a metso e mehlano, taba eo, 'me ha ho motho ea kileng a ntšupisa eona. Bibebe ha e itoantše. Holane e le joalo, ekabeba ha se Bibebe. Jehova e moholo, mohlokapeletso A ke ke a Itoantša, ha ho khohlano kahara Bibebe. E mpa e le kutloisiso e phoso ea batho.

<sup>15</sup> Joale ho haha motheo o itseng, ho fihlela re khutla. Joale, Buka ea Baheberu e ngotsoe ke Mohalaleli Pauluse, e ngoletsoe Baheberu. E 'ngoe o e ngoletse Baefese, e le batho ba Efese, Kereke ea Bokreste; e 'ngoe ho Maroma a Roma; le e 'ngoe ho Bagalata; le e 'ngoe ho Baheberu.

<sup>16</sup> Joale, re a elelloa Pauluse, e ne e le mosuhe oa Bibebe, le ho qaleng. Re ithutile hoo. Hore o kile a lula tlasa mosuhe e moholo, e mong oa ba baholo ba letsatsi la hae, Gamaliele. 'Me a hlile a tseba Testamente ea Khale. A e tseba hantle. A mpa a fetoha mohlorisi oa tsela e neng e le Tsela ea Kreste, kaha a na a rutiloe Testamente ea Khale tlasa mesuhe. Empa mesuhe, ka tloaelo ka nama... Ke tšepa ke sa bue letho le phoso.

<sup>17</sup> Empa, ka tloaelo, motho ha a tšoere thuto le tsamaiso ea likolo, ka tloaelo e betliloe ke motho. Ua bona, ha e a bululeloa, hoba e fetoha thuto ea sekolo. Le kajeno rea e fumana. Presbeteriene, Lutherane, Pentekosta, likolo tsena tshole li bopile mohopolo oa tsona, 'me li mpa li lohella ntho ena ka Mangolo.

<sup>18</sup> Le kahara Testamente ea Khale ho ne ho tšoana. Empa, Pauluse, ka koetliso ea hae e khabane, a bile a tseba Mangolo ka lentsoe. Empa, ua bona, Mangolo, ho sa tsotelehe u a tseba ka bokhabane hakae, ha Moea o sa a phelise, letere e a bolaea. Moea o a Phelisa. Ua bona, e ka khona e phelisoe, kapa e kenngoe bophelo, ke Moea. Ekare ha Moea o sa phelise Lentsoe ho u netefaletsa Lona, letere e mpa e le hlalefo. Lebaka leo re fumanang Bakreste ba bangata hakana ba maipolelo kajeno, kapa Bakreste ba molomo, ke kutloisiso eo ea Kreste ka kelello.

<sup>19</sup> Ebe re tloha re re, "Be, o ne a tlameha ho utloa ho hong; 'me u ne u tlameha ho etsa ho hong." 'Me, oh, re tla kena nyeeng eo eohle, ka mora nakoana. E mong keha a tlameha ho hooeletsa. Bamethodise ba ne ba tloaelo hore ba tlameha

ho hooeletsa, pele ba o fumana. Mapentekosta a ne a tlameha ho bua ka lipuo, pele ba o fumana. Le, oh, ba bang ba bona, Batsukutli, ba ne ba tlameha ho tsukutlana. Yaa. Ntho ea khale... Ba ee holimo-le-tlase, banna ka lehlakoreng le leng, le basali ka ho le leng. Ua bona? Batsukutli. Ebe Moea o Halalelang o theohela holima bona o ba tsukutle. "Ba ne ba O fumane." Empa ntho eohle ke ho phofa. Ha ho 'Nete ho eona.

<sup>20</sup> Molimo o phela Lentsoeng la Oona. "Tumelo e tla ka kutlo, ho utloa Lentsoe." "Le bolokehile ka tumelo, ka mohau." Hase ka letho, haeba u hlokohleha, kapa u bua ka lipuo, leha ho ka hlaha'ng. Ha e amane le eona ka letho, ho hang. Jesu o itse, "Ea utloang Mantsoe a Ka 'me a lumela ho Ea romileng 'Na, o na le Bophelo Bosafeleng. Ea utloang Lentsoe la Ka a lumela, le phelisitsoe ho eëna, o na le Bophelo Bosafeleng." Ke moo he. Nthoana eo u e etsang ha se taba.

<sup>21</sup> Joale, ha ke khahlano le ho thefuleha, kapa ho bua ka lipuo, kapa ho thefuleha, oh, ntho eo—eo ea ho hooeletsa. Hoo ho itoketse. Ho hotle. Empa ke litholoana feela. Ua bona? Nka u kholela apole sefateng, le joale ha u a fumana sefate. Ua bona? Uena... Ke litholoana.

<sup>22</sup> Leshano, ho utsoa, ho noa, ho tsuba, ho mokola, ho feba, hase sebe, ke litholoana tsa ho se lumele. Ua bona? Ke seo uena—uena... U e etsa hoba u le moetsalibe. Ua bona? Empa pele u moetsalibe. Ke hona ho u etsisang hona, hoba u sa lumele. Ha u fela u lumela, ha u etse hoo. U na le lerato, thabo, khotsa, mamello, molemo, bonolo, mosa, tiisetso. Eo ke tholoana ea Moea o Halalelang. Ua bona?

<sup>23</sup> Ka hona re fumana linthroana, litšisimohonyana, kahobane motho a fapohile tsela ea khale, e hlenneng ea Lentsoe. Ke Lentsoe. "Tumelo e tla ka kutlo."

<sup>24</sup> Ka hona eitseha Pauluse... Molimo o khethile Pauluse. Motha a khetha Matthiase. Mohla a... Ba laotse ka lotho, empa ha a sebetsa letho. Hoo ho supile matla a kereke mohlang oo, a ho khetha, ho khetha bahlanka ba eona, le ho roma bareri ba eona litulong tse fapaneng. Hangata, ke ntho ea nama.

<sup>25</sup> Motha a ee moo Molimo a mo tataisetsang teng. Ke rata hoo. Haeba batho ba kahara seboka ba re, "Be, kereke e ntle ke ena. Moena enoa o hahile kereke e ntle. 'Me ke khetho ea rōna.'" Ba tla mo romela kerekeng ena. Ha ba hlokomele hobane ba ipolaea. Ua bona? Taba ea pele, ha monna eo a kena ka mono, ha a khone ho tlatsa setulo sa monna eo. Ba mpa ba fokolisa kereke, ka ho leka ho reklohela khetho eo. Esale ho le joalo.

<sup>26</sup> Empa ke lumela boholong bo tletseng ba phutheho ea selehae. E. Kereke e ke e ikemele, e khethe balebeli ba eona, bahlanka ba eona, e ka bang eng. 'Me hape, ka tsela eo, monna ea ka mono ha a okameloa ke bishopo. Moea o Halalelang ha o batla ho bolella kereke eo letho, ha ba tlameha ho botsa mang

ho etsa *sena* kapa ho etsa *sane*. Motho ke eèna ea holehaneng le Moea o Halalelang. Mpontšeng boholo bo phahamelang boo ka Bibele, kahara Bibele, bo fetang moholo oa kereke ea lehae? Ke hantle, e, monghali, boikemelo ba kereke ea lehae, kereke efe le efe ka boeona. Joale, boèna, bo a babatseha. Likereke tsohle li tlameha ho fupara boèna ka mokhoa oo, 'moho. Empa boikemelo ba kereke ea lehae!

<sup>27</sup> Lemohang Pauluse, ka ho ba mosuhe e moholo le setsebi, a rupeletsoe hamonate, tseleng ea hae ea Damaseka, tsatsi le leng, ho hlahlela batho ba tsamaeang Tsela e ncha ena. Joale, o ne a tjantjèlla. Molimo ha o u ahlole ka ka tjantjèllo ea hao. Ha ke eso bone batho ba fetang bahetene ka tjantjèllo. Esitsa le ba bangata ba bolaea bana ba bona, lefeela, ho—ho hlabela molimo oa bohata. Hase ka tjantjèllo. Motho a ka noa chefu ea khaboliki, ka tjantjèllo, athe o hopotse a enoa ho hong. Tjantjèllo ha e u pholose. "Ho motho tsela e ka bonahala e lokile, athe bofèllo ba eona ke litsela tsa lefu."

E ne e le ka tjantjèllo mohla Pauluse mohla a na a pakela, ka bolaoli ba hae, tlepetsø ea Setefane. Lilemo hamorao, ke rata boinyatso ba Pauluse, o itse, "Ha ke tšoaneloe ke ho bitsoa morutuoa kapa ho bitsoa moapostola, hobane ke ke hlorisitse Kereke ho isa lefung." Ka tjantjèllo!

<sup>28</sup> 'Me tseleng ea hae e theohang, o kopane le boiphihlelo. Moea o Halalelang o tsoile ka Topallo e kholo ea Mollo, 'me Ea mo foufatsa. Joale, re haotse moo, Topallo eo ea Mollo e ne e le Kreste. 'Me E sa le Topallo ea Mollo e ile ea tsamaisa bana lefeelleng. Kreste e ne e le Molimo, 'me Molimo e ne e le Kreste. Molimo o no o etsoe nama oa aha kahara 'mele oa Morena Jesu. "Molimo o no o le ka ho Kreste, a khutlisetsa lefatše ho Oona," ho supa seo O nong o le sona.

<sup>29</sup> Kahara Bibele morao mona, litemana tse qalang tseo re li balileng, ho thoe, "O Ipehile ea katlasana ho Mangeloi. Ho apara setšoano, e seng sa Mangeloi, empa ho apara setšoano sa nama." Hase Mangeloi a oeleng, ha a hloke topollo. Nama ke eona e tlotseng, bana ba batho, 'me ba ne ba hloka topollo. Ka hona, melaong ea khale, monna, ho beoa e—e molopolli, pele o ne a tlameha e be oa lesika; Buka e kholo ea Ruthe, re fetile ho eona mona, nakoana e fetileng. Le kamoo Molimo, e leng Moea, a entsoeng lesika la rōna, ka ho fetoha e mong oa rōna, ho re lopolla le ho re abela Bophelo Bosafeleng. O ile a tlameha ho fetoha rōna, hore rōna ka mohau re tšoane le Eèna.

<sup>30</sup> 'Me re fumana bana ba Israele ba tsamaisitsoe ke Topallo ea Mollo. 'Me eareha E etsoa nama mona holima lefatše, re Mo utloa a bua ka tsatsi le leng, le ho Itlaleha E ne e le Topallo ea Mollo. Ba itse, "U re u moholo ho ntat'a rōna Abrahama?"

<sup>31</sup> A re, "Pele ho Abrahama, KE TENG." KE TENG e ne e le mang? Topallo ea Mollo e sehlahleng se tukang, sehopotso

sa kamehla molokong ofe le ofe; e sang molokong oo feela, empa le ho moloko ona, Topallo eona eo ea Mollo. 'Me hoseng hona re lebohela le ho fumana setšoantšo sa Eona, ho re ha A eso fetoh. Ke Mohlolehi, Rabosafeleng, Ea Bokoang eo. Hona joale O etsa lintho tse tšoanang le tseo A li entseng mohlang oo, 'me hoo ho re thabisa hakae.

<sup>32</sup> Empa le pele Pauluse a amohela boiphihlelo bona . . . Ka ho tseba Lengeloi la Morena e ne e le Topallo ea Mollo, e neng e le Kreste, e leng . . . Be, E ne le Lengeloi la Selekan, lona e ne e le Kreste. Moshe o ile a hopola ho le molemo, hoo, o khethile ho hlorisoa le batho ba Kreste, le ho tsamaisoa ke Kreste, ho ena le menono eohle ea Egepet. A sala Kreste morao, ea neng a nkile setšoano sa Topallo ea Mollo.

<sup>33</sup> Eaba Kreste o re, "Ke tsoile ho Molimo," mohla A ne a le mona holima lefatše, "Ke khutlala ho Molimo." Ka morao ho lefu la Hae, kepèlo, tsaho, 'mele o tlotsitsoeng o lutse letsohong le letona la Boholo, e le 'muelli; Pauluse o Mo bone e le Topallo ea Mollo, hape: Leseli le foufatsang mahlo, mohlomong; le ileng la mo foufatsa.

<sup>34</sup> Petrose o Mo bone a kena chankaneng e le Leseli, le bulang menyako ka pel'a hae ha a etsoa. Re Mo fumana e ne le Alfa le Omega, oa Pele le oa Morao.

<sup>35</sup> 'Me ke enoa O na le rōna, kajeno, ho etsoa tsona lintho tseo A li entseng mohlang oo, ho boela a Itlhahisa pontšeng ea rōna, ho e bontša lefatše la mahlale.

<sup>36</sup> Oh, hora e kholo ena ea lefifi le ea tšenyeho e hahabang holima lefatše, e ka khona re be batho ba thabileng ka ho fetisa lefatšeng lohle, ho nyakalla, ho tseba. Ka linako tsohle, enereha batho ba topetsoe litokomane, 'me ho hlahile mekha ea mefuta eohle holima lefatše, 'me koana, le kajeno, Molimo oa makhonthe, le o phelang, ka Lentsoe la Oona le ka kholiso ea Ona ea phatlalatsa, o re supisa A ena le rōna mona, a sebetsa, a tsamaea, a phela, a tsamaea joalokaha O tsamaile kamehla. Re batho ba fuoeng monyetla o mokakang, ho fumana sena! Re tlameha ho . . . Bibele e boletse, hape, khaolong ea 2, "Re lokela ho tiisetla lintho tsena. Hobane, re tla phonyoha joang ha re sa hlokomele poloko e kalo?"

<sup>37</sup> Joale, re khutla ho fumana, hore Pauluse pele a amohela boiphihlelo boo . . . Joale, re ntse re cheka. Joale, ho sa tsottelehe mofuta oa boiphihlelo ba hao, kereke, ke batla ho u botsa taba. Ho sa tsottelehe bo shebeha bo babatseha hakae, bo bonahala bo tīle hakae, pele bo tlameha ho hlahloja ka Bibele. Kamehla holima Lentsoe! U se ke ua tlohela Hoo, ho amohela boiphihlelo ba mofuta ofe feela.

<sup>38</sup> 'Me Pauluse, pele a bo amohela, o theohetse Arabia, 'me teng a qeta lilemo tse tharo, a ntse a hlahloba boiphihlelo bona ka Lentsoe. 'Me ha a khutla, keha a kholisehile. A ke

ke a ferekanngoa ke letho, kaha a ne a theiloe Lentsoeng ka ho tiea, a sa sisinyehe. 'Me mona o retoloha ho bontša Baheberu bana, lintho tse kholo tse boletsoeng, tsa Testamente ea Khale, li ne li bonahalitsoe ka ho Jesu Kreste. Tlotliso e kakang!

<sup>39</sup> Joale, Sontaha se fetileng, kapa Laboraro le fetileng, ka hare ka mona Moena Neville, ka hara khaolo ea 5, o hlabile libaka tsa sehllooho, kaha e le khaolo e khabane. 'Me re mo fihlela a tšoarana le khaolo ea 4, Sontaha se fetileng, mabapi le *Sabbatha*, ho boloka Sabbathatha. Ana le kholisehile, hoseng hona, le tseba seo ho boloka Sabbathatha ho se bolelang? Haeba le khona, e reng, "Amen." [Phutheho e re, "Amen."—Mong.]

<sup>40</sup> *Sabbatha* ke "Phomolo" eo re kenang ho eona, e seng ka letsatsi, e seng ka taelo, empa ka ho kena ka ho Kreste e leng Sabbathatha ea rōna. Ke Sabbathatha ea rōna. Re haotse le eona Testamente ea Khale eohle, ra bontša hore ka tsatsi le leng Lentsoe le tla fihlela e le "taelo holima taelo, molao holima molao." "Me O pakile hobane re kene Phomolong ea Hae ka Letsatsi la Pentekosta, "Hoba e le hona ho tla phomotsa batho ba khathtseng, ba imoloe."

<sup>41</sup> Rea fumana, ho re, "Molimo o balile letsatsi le leng ka Davida, malebana le letsatsi la bosupa." 'Me, "Molimo o phomotse ka letsatsi la bosupa." Oa le nea e—e bana ba Israele lefeelleng. "'Me hape, O balile letsatsi." E ne e le letsatsi lefe? Letsatsi le ikhethang la veke? "Mohla u utloang Lentsoe la Hae, u se thatafatse pelō ea hao." Ke hona mohla A kenang, ho u nea khotso ea Bosafeleng, Sabbathatha ea Bosafeleng.

<sup>42</sup> Ha u tsamaee kereke ka Sontaha, ho ba morapeli, he. Ha u tsoetsoe ke Moea oa Molimo, u kena Phomolong kamehla, haesale ho boloka sabbatha. U ka *hara* Sabbathatha, ka linako tsohle, kamehla, le ka Bosafeleng. "Mesebetsi ea hao ea lefatše e fetile," Bibele e rialo, "'me u kene khotsong ena e bokoang."

<sup>43</sup> Likhaolo tse hlano tsena tsa pele li hlomamisa Jesu e le Moprista e Moholo. "Molimo mehleng ea khale o buile le bontate ka mekhoa e mengata ka baporofeta, empa letsatsing lena la ho qetela ka Mora oa Oona, Jesu," khaolo ea 1, temana ea 1.

<sup>44</sup> Ebe ho theoheloq etellong ea khaolo ea 5, re Mo fumana a bapisitsoe ke "Melkisedeke, ea neng a se na qaleho ea matsatsi, a se na pheletso ea bophelo, empa e le Moprista ea sa feleng kamehla." E nahaneng. Ebe Monna e moholo enoa e ne e le mang? Re tla kena ho eona, likhaolong tse ling tse ka bang peli. Bophelo ba Hae bohole, re tla batlisisa. "Monna e moholo enoa ea kopaneng le Abrahama, ha a eso be le papa, ha a eso be le mama. Ha ho mohla A qalileng bophelo, kapa ha ho mohla A tla qetella nako ea Hae ea bophelo. 'Me o kopane le Abrahama a tsoa bolaea morena."

<sup>45</sup> Lemohang Motho e moholo enoa, hore E ne e le Mang, o sa ntse a phela. O ne a se na qetello ea bophelo. E ne e le Kreste, eo a kopaneng le eëna. Re tlil'o kena patlisisong e tebileng ea hoo, matsatsing a 'maloa.

<sup>46</sup> Joale, re batla ho qala mona khaolong ea 5 joale, ho haha motheo o seng mokae pele re tšoarana le ea bo-bo 6, hoba ke ntho e tsoileng ka mahetla ruri. Le mpe le shebisise. Re tlil'o qala ka temana ea 7 ea khaolo ena. Be, ha re qaleng ka temana ea 6.

*Joaloka lengolong le leng ho itsoe, Uena u moprista ka ho sa feleng ka mokhoa oa Melkisedeke.*

*Eo mehleng ea hae ea nama ea hae, a...hlahisa ka mohoo o moholo...ka meokho merapelo ea hae e bohloko ho ea...eo a neng a ka tseba ho mo loela lefung, 'me eitse hobane a utluoe ka baka la borapeli ba hae;*

*Leha koana e ne e le Mora, mohla a...ithutile kutlo ka tse bohloko tse mo hlahetseng;*

<sup>47</sup> Joale moo ke batlang ho fihla teng ke mona, temaneng ena ea 9. Mamelang. Kea kholoa Moena Neville o e amme, Laboraro. Ke ne ke le sieo. Be, mamelang.

*'Me joale ha a phethehile, o entsoe moetsi oa poloko e sa feleng ho bohole ba mo utloang;*

*'Me Molimo o 'moletse hore ke moprista e moholo ka mokhoa oa Melkisedeke.*

*Bakeng seo re na le taba tse ngata tseo re ka li bolelang,...*

<sup>48</sup> Re e tlohela hona mono, kaha re tla tšoarana le Melkisedeke masiung a 'maloa.

<sup>49</sup> Joale re tlil'o qala ka sena, patlisiso ea rōna ea tloaelo. Ekare...Ke tla e bala kaofela nakoaneng, temana ea 11.

*Bakeng seo re na le litaba tse ngata tseo re ka li bolelang,...li thata ho hlalosoa, ka hobane le fetohile ba botsoa ho mamelelang.*

*Hobane ekabeba...khale le le baruti, athe lona le sa ntse le tšoaneloa ke ho rutoa litaba tsa bonyenyane tseo taba tsa Molimo li qaloang ka tsona; 'me le fetohile batho ba tšoaneloang ke ho fepjoa ka lebese, sebakeng sa lijo tse tiileng.*

*Hobane e mong le e mng ea fepeloang ka lebese o sitoa ho ikutloela lentsoe la ho loka: kahobane e sa le ngoana.*

Oh, ke kholoa Moea o Halalelang o e tebisitse tlase botebong ba hao joale.

*Hobane eo ea—ea fepeloang ka lebese o sitoa ho ikutloela lentsoe la ho loka: kahobane eo ke lesea.*

<sup>50</sup> Ha u fepa lesea nama e thata, u a le bolaea. Lebaka leo batho ba bangata ba reng, “Ah, ha ke—ke lumele hoo,” ba nt oo tloha ba ikela. Esale masea! Ba mpa ba sa khone ho utloisia. Ha ba khone ho hlalohanya ’Nete eo. E—E a ba bolaea. Kereke e tlameha e be e tseba lintho tse kholo, tse matla kajeno, empa u ke ke ua E ruta. Ba—ba—ba—ba khopjoa ke Eona. Ha ba tsebe seo ba ka se etsang ka Eona.

<sup>51</sup> Pauluse, o buisana le sehlopha sena sa Baheberu... Koana, u buisana le barutehi joale, barutehi, ba hlileng ba rupeletsoeng. Rea fumana, metsotsong e ’maloa—e ’maloa, ba ne ba hlile ba rutehile. Empa haele Sephiri se tebileng sa moea, kereke e foufetse nqa Sona. O boletse, “Ekabeba le se le ruta ba bang, athe le sa le lesea.”

<sup>52</sup> Oh, kea tseba ho hlaha bongata bo tsoang bo re, “Oh, ha ke sa hloka ho tsamaea kereke. Ho bokoe Molimo, Moea o Halalelang o tlie, Ke oona moruti.” Ha u fihleloa ke mohopoloo oo, u hlile o positse. Hoba ebe hobaneng Moea o Halalelang o behile baruti kahara kereke, haeba E tla ba moruti? Ua bona? Ba pele ke baapostola, baporofeta, baruti, baevangeli, le balisa. Moea o Halalelang o beile baruti kahara kereke, e le hore A khone ho ruta ka moruti eo. ’Me haeba e—e sa latele Lentsoe, Molimo ha o e chaelle, e tla be e se thuto ea mofuta o loketseng. E tlameha ho bapa le Bibele eohile, ’me o tla phela mokana E phetse mohlang oo. Ntho ea sebele ke eo e bonahatsoa.

<sup>53</sup> Joale elelloa.

*Empa lijo tse tiileng ke tsa...ba tiileng, e leng bao  
ka mabaka ho khetha...likello tsa bona li sebelitseng  
lemaletseng ho khetha ho hotle le ho hobe ke ho  
sebelisoa hona.*

Ho tseba ho lokileng le ho phoso, ka ho khetha.

<sup>54</sup> Joale elelloang, joale re qala thuto ea rōna. Motheo o moholo ona joale, a re feteleng temaneng ea 1.

*Ka baka leo ha re feteng litaba tsa thuto ea  
Kreste,...*

Ebe o re’ng? Likhaolo tsena tsohle tse hlano tsa pele esale li tsetlehiloe holima Kreste, ho Mo supa seo A leng sona. Joale re feta litaba tseo tsa lithuto ea Kreste.

<sup>55</sup> Re Mo fumana e le eng? Re Mo fumane e le Jehova Molimo o Moholo o entsoeng nama. Re Mo fumane e se—se moporofeta, empa bottlalo bohole ba BoMolimo ka ’mele. E ne e le Jehova ea entsoeng nama. ’Me ’mele, Jesu, e ne e mpa e le tabernakale ea Hae. Molimo o ahileng ka ho motho. Molimo o boelangoa le motho, ka motho, ka tsoalo ea Mora oa Oona ka Sebele ka moroetsana. ’Me Jehova, Moea, o no o ahile ka ho Eèna.

<sup>56</sup> Joale, ba hopolang thuto ea BoMolimo ba bakae, kamoo re ileng ra khutla ra fumana Molimo eka mookoli o moholo o

nang le Moea o fapaneng oa mefuta eohle, O ne o le joang? 'Me eaba Logos e tsoa ho Molimo, e ileng ea fetoha theofani, 'me eona keha e nkile sebopoho sa monna. 'Me Moshe o fetile pel'a Eona, lepatsong la lefika. 'Me eaba theofani eo e fetoloa nama ea motho ka botlalo, Kreste.

Le kamoo re fumaneng hoba rōna, ka mohau oa Hae, re ruile Bophelo Bosafeleng. Joale, lentsoe *kamehla* ke “sebaka; nako e itseng.” Ho boletsoe, ka hara Bibele, “Kamehla *le* mehla,” ke lekopanyi. Empa *kamehla* e bua feela ka “nako.” Empa Bosafeleng bo lekanya kamehla. 'Me ntho e bileng le qalo e na le qetello, empa lintho tse sa kang tsa qala ha li na qetello. Ha ho le joalo Molimo ha o a ba le qalo 'me ha O na qetello.

<sup>57</sup> 'Me ka hona, ka baka leo, Melkisedeke, Moprista e moholo, ea kang motho, O ne a se na qaleho 'me ha A na qetello. 'Me mohla rōna, ka theofani eo, eona, re ne re etsoe ka setšoantšo sa Molimo le pele lefatše le boptjoa; mohla theofani eo e bopiloeng e ne e etsoa nama le ho aha hara rōna, ke moo, ka lefu la Hae, rōna re amohelang Moea oa Hae 'me ha re na qetello; Bophelo Bosafeleng; e seng Mangeloi, empa banna le basali. Oh, ke... Ka mokhoa o itseng, hola nka e tlisa ka mokhoa oo letšoelé la ka—la ka le ka e tsoarang! Ha u sa tla fetoha Lengeloi le ka mohla. Molimo o bopile Mangeloi, empa Molimo o bopile motho. 'Me seo Molimo o se bopang se tsoa ho Molimo, 'me ke sa Bosafeleng joaloka Molimo. 'Me motho ke oa Bosafeleng joaloka 'Mopi oa hae, hobane o bopiloe ho tsoa Bosafeleng.

<sup>58</sup> Empa sebe se na le qetello, tšotleho e na le qetello. Ka baka leo, lihele tsa Bosafeleng li ke ke tsa eba teng. Lihele li teng, tsa mollo le sebabole, re tseba seo, empa ha ho lihele tsa Bosafeleng. Mofuta oa Bophelo Bosafeleng o mong feela 'me oona ke oa Molimo. Efèla haeba u tlil'o sotleha kamehla, ekabeba u ruile Bophelo Bosafeleng. Lihele li na le qetello, ekaba libilione tsa lilemo, empa qetellong li tla fela.

<sup>59</sup> Bibele ha e bolele, kae kapa kae, ho thoe ba ile ba sotloa ka Bosafeleng, ho itsoe, “Kamehla *le* mehla.” Jonase o hopotse a hlotse mpeng ea leruarua “kamehla,” le eèna. *Kamehla* e beetsoe sebaka kapa nako e baliloeng. Empa *Bosafeleng* ke tsoelliso, ha bo na qalo kapa qetello. Bo tšoana le lesale, selikalikoe. 'Me ha nako ea rōna e ntse tsamaea, re mpa re phikoloha mererong e meholo ea Molimo.

<sup>60</sup> Morero oa Molimo e ne e le ho bopa motho ka setšoantšo sa Hae, ho thea setsoalle le Eèna. 'Me Oa mo etsa boleng bo ka angoang. Joale, sebe se re kentse boemong ba—ba—ba tšilafalo, empa hoo ha ho khaotse lenaneo la Molimo. 'Me, motsoalle oa moetsalibe, kajeno, ha u sa tsoaloa labobelí ke Moea oa Molimo, u na le qetello nqa e 'ngoe. 'Me qetello ea hao ke tšenyeho, timelo, le mahlomola le bomalimabe. Empa ho lona ba lumetseng ho Morena Jesu, 'me u amohetse hoo e le Mopholosi

oa hao, ke ea Bosafeleng joaloka Molimo ha e le oa Bosafeleng. Ha u na qetello, "Ke ba nea Zoe ea Bosafeleng, Bophelo ba Molimo ka sebele, 'me ba ke ke ba timela le ka mohla kapa ba kena kahlolong, empa ba falletse lefung ho kena Bophelong." Ke seo A neng a le sona. Ehlide O tlide ka morero oo.

<sup>61</sup> Joale, Jesu, ho tleng ha Hae, ka boprista ba Hae, ha a tlela ho rekolohehoa. Batho ba bangata ba e ruta joalo, ho thoe O tlide, ho re, "Be, koana ha Nka sotleha, Nka fetoha e—e—e pono e hauheloang 'me ruri batho ba tla tla ho 'Na." Eo ke phoso. Ha ho Lengolo la hoo.

Hoba, motho mang le mang ea tla bolokeha, Molimo o ba tsebile le pele lefatše le boptjoa. Bibele e itsalo. "Molimo ha o rate ha mang a ka timela." O batla bohole ba finyelle pakong. Empa, erekaha e le Molimo, O e tsebile ka boitsebelopele.

<sup>62</sup> Shebang ho Baroma, khaolo ea 8. Pauluse o ne a tiiselitse holimo mono, a bua ka khetho ea Molimo, ho thoe, "Esau le Jakobo, le pele lesea lefe le hlaha, kapa eng, Molimo o itse O ba tsebile 'me O hloile Esau athe o ratile Jakobo," le pele moshanyana ofe a fuoa e—a fuoa monyetla oa ho hlalosa kananèlo ea hae, hoba E ne e le Molimo. O a tseba... Ke mohlokapeletso. Haeba E le mohlokapeletso, O tsebile letsetse ka leng, ntsintsi ka 'ngoe, tsetlo ka 'ngoe, ntho efe e tla fihla holima lefatše le ka mohla. O e tsebile. Ke mohlokapeletso, Easafeleng, mohlolèhi, Molimo o bokoang, eamatlaohle, motlalahohle, motsebatsohle. Ha ho letho leo A sa le tsebeng. Ka hona O khona ho bolela qetello. O tsebile qetello e sa le qalong.

<sup>63</sup> Boporofeta ke boitsebelopele ba Oona feela. Ke leqoetha la sehlooho. Èèna, Ke e... Ke moahloli. 'Me O bolella e—e ramolao bohlale ba Hae feela. 'Me ke seo boporofeta bo leng sona, bo khonang ho e lepa, hoba O tseba se tlang ho hlaha. Joale, ke oo Molimo oo re o sebeletsang. Hase molimo oa histori, e sang joaloka Mabudda le Mahammed, le ba joalo. Empa, Molimo motlalahohle, ea leng hantle mona joale, hoseng hona, kahara tabernakele ena hona joale; Jehova e Moholo, KE TENG, Ea kileng a Ipopa ka boikokobetso, ho apara sebopreho sa nama e tletseng sebe. Ke Enoa moo a leng teng. Ke Èèna ea u lopolotseng. E mong a ke ke a fumanoa, nqa e sele, ea ka e phethisang nakong efe.

<sup>64</sup> Molimo o no o sa emisa batho ba bararo holimo mono, eaba O roma e mong oa bona, Mora oa Hae. E ne e le Molimo, ka Sebele, ea tlileng ka sebopreho sa Mora. Mora o na le qalo, 'me Mora o ne a ena le qalo. Taba eo, ho lona batho ba bang ba ratehang ba Katolike, ke tšoere buka ea lona, *Facts Of Our Faith*, e itse, "Bomora ba Molimo ba Bosafeleng." Ebe lentsoe leo le ka le hlalosa joang? Ebe le ka le nea kelello joang? E ka ba oa Bosafeleng joang? Hase Bibele eo. Ke

buka ea lona, “Bomora ba Bosafeleng.” Ha ba... Lentsoe leo ha le a loka. Hoba, ntho efe eo e leng mora ebile le qalo, athe Bosafeleng ha bo na qalo, ka baka leo hase bomora ba Bosafeleng. Kreste o fetoha nama ’me o aha hara rōna. O bile le qalo. E ne e se bomora ba Bosafeleng. Ke BoMolimo ba Bosafeleng, e seng bomora. Joale, O tlide ho re lopolla, ’me O hlile a re lopolla.

<sup>65</sup> Joale, Pauluse, o fihla mono, etsoe ke tiile hobane le utloisisitse ka lithuto tse fetileng. Re tla boela re e phetha, ka nako e ’ngoe, ha Morena a ratile, temana ka temana, joale.

*Ka baka leo ho fumana... a re feteng litaba tsa–tsa thuto ea Kreste tseo ho qaloang ka tsona, ’me re feteleng ho tsa kholo e tletseng; ...*

<sup>66</sup> Ba khoptjoa ke taba eo. Ha ho joalo? A re etseng eng?

*... ha re feteleng ho tsa kholo e tletseng; re se boele ra thea metheo...*

<sup>67</sup> Shebang sena. Ha re tšoareng lentsoe lena “phetheho.” Na u tseba mokhoa oa ho ema pel’ a Sefahleho sa Molimo o le mong feela? Oona, ke phetheho. Molimo ha o ke o mamella lintho tse sa halaleleng.

<sup>68</sup> ’Me lona boramolao: le ka hla la iphethahatsa joang, athe ka ho lona ha ho ntho le e ’ngoe ho iphethahatsa ka eona? U tsoaletsoe sebeng. U emoletsoe sebeng. Eona takatso ea boteng ba hao mona e ne e le sebe. “Ho tsoalloa sebeng, ho bopeloa bokhopong, ho tla lefatšeng u bua mashano.” Joale ebe u tla ema hokae?

<sup>69</sup> Ebe uena, moetsalibe, ea—ea buileng a re, “Ke tla khaotsa ho tsuba. Ke tla ea Leholimong”? U hokae, uena ea fofo, ea sekotlo se bolele, ea reiloeng Mokreste, ea likolohang hohle mona ka sefahleho se se lelele a ntse a bua, taba eo, “Be, ke setho sa kereke”? U moetsalibe. Ke hantle. Ha u sa tsoaloe ke Moea oa Molimo, u lahlehile. Ke eona hantle.

<sup>70</sup> Ebe u ea joang Leholimong? U re, “Ha ke eso bue leshano bophelong ba ka. Oh, moratuo a monyenyan. E—e ne e le Lengeloi, le ho qaleng.” Leo ke leshano. Ha ke tsotelle ho loka ha hao; u moetsalibe. ’Me ha u na ntho le e ’ngoe; ha ho moprista, ha ho bishopo, ha ho khadinale, ha ho mopapa, ha ho letho le ka u pholosang, hoba le eēna ke khala ea molapo oo. Re tlil’o kena ho eona metsotsng e ’maloa. Ka setšoano seo a neng a le sona feela. Mopapa oa Roma o tsoaletsoe sebeng, o bopetsoe bokhopong, o tlide lefatšeng a bua mashano, o tsoetsoe ka takatso ea bong ea monna le mosali. Ho loka ho tsoang mono u ka ho fumana hokae?

<sup>71</sup> “Be, papa oa hae le mama ba tsoetsoe ka ho tšoana, le bona ba tsoetsoe ba itšoanel, le nkhona’ e le ntata’ e moholo ba mo etileng pele.” Ke sebe, le ho qaleng!

<sup>72</sup> Ka hona ke mang ea ka reng *sena* se a halalela le *sane* se a halalela? Ea halalelang o mong feela, ke Jesu Kreste, Mora Molimo o phelang, Ea entsoeng Mophethehi. 'Me re hlokoa ho phetheha. Joale, ebe re ka e finyella joang? Ako e leke, ka bouena. Ha ke batle ho leka ho fihla Leholidong ka maipoleliso a reng, "Ke tsoetsoe metsotsos e mehlano e fetileng, 'me ke siea lefatše hona joale." Ke tla be ke lahlehole. Haeba ke eso hopole bobe bophelong ba ka, ke eso bue lentsoe le lebe bophelong ba ka, ke eso shebe bokhopo bofe, ke eso nahane bokhopo, kapa le letho, ke sa eme ka botšo ba mabota a rothang a lihele. Ke moetsalibe.

<sup>73</sup> Nka fihla bophelong 'me ka koalloa phaposing, joaleka likhaiseli tsa Carmelite kapa ho hong, 'me ke sa ka ka bona lefatse, ka lula mono ka rapela bophelo ba ka bohole, ka etsa botle, ka tsoaloa ke le ralimilione ka abela mafutsana maruo a ka oohle, koana ke sa le moetsalibe 'me ke ea liheleng. E, monghali.

<sup>74</sup> Nka ingolisa le kereke ea Luthere, Baptise, Pentekosta, Presbeteriene, ho tloha mohla ke ngoloang betheng ea masea, ka phelela kereke eo ka botsepehi hofihlela lilemo tse lekholo, 'me ha bophelo ba ka bo nkuoa, ho se motho ea ka ntšupang ka monoana a re "Le mohopolo o mobe feela ha a eso o nahane," ke tla ea liheleng joalekaha ke eme.

<sup>75</sup> Ke moetsalibe. Ka nèpo. Ha ke na letho. Ha ho mokhoa, ho hang, ho fumana moputso ofe—ofe o ka lefshoang. Molimo o no o batlike lefu. 'Me ha nka nehela bophelo ba ka ka sebele, ha nka nehela bophelo ba ka, ebe nka baka joang? Hoba, u... Molato o tlameha ho lefshoa, pele. 'Me Molimo ke oona o Inotši o nong o ka beha bophelo ba Oona fatše 'me oa boela oa Bo tsosa. Hore O tle o fetohé sebe, le ho beha Bophelo ba Oona fatše 'me o boele o Bo tsose, 'me taba eo o e bitse "toka," 'me molato o lefiloe. Ke lona bao.

<sup>76</sup> Joale a re phetleng ho Mattheu, khaolo ea 8, kea kholoa, khaolo ea 7 kapa ea 8. Re tla bona seo Jesu a se buileng mona. Ho lokile. Ke Mattheu, khaolo ea 5. Le e...Jesu, o a rera, o rera therou ea thabeng, temana ea 47.

'Me ha le lumelisa banababo lona feela, u etsa ho fetisang hofe? balekhetho le bona ha ba etse joalo...?  
(Shebang.)

Empa 'me joale phethehang,...(Eng?)

'Me joale phethehang, joalokaha Ntata lona ea maholidong a phethehile.

Oo e ne e le molao oa Jesu, "Le be joalo."

<sup>77</sup> Ba re, "Ha ho motho ea ka phethehang, Bibele e boletse, 'Ha ho ea phethehileng.' Toantšano ea lona ke eo." Na ebe ke eona? Ho lokile.

<sup>78</sup> U ke ke ua phetheha ka bo-uena. Ha u itsepisa ka seo u se entseng, u lahlehile. “Phethehang, joalokaha Molimo o phethehile.” Joale:

‘Me joale phethehang, joalokaha Ntata lona...  
maholimong a phethehile.

<sup>79</sup> “Ka baka leo . . .” Joale khaolo ea 5, khaolo ea 6 ea Baheberu.

Ka baka leo a re feteng litaba tsa thuto ea Kreste  
tseo ho qaloang ka tsona, ‘me re feteleng ho kholo e  
tletseng; . . .

<sup>80</sup> Joale, lona, Branham Tabernakele. Oh, kea tseba, “Re na le lipholiso.” Hoo ho hotle. “Re na le lipono.” Oh, hoo—hoo ho hotle. Le bile le lora litoro tsa moea, nako tse ling ha se litoro tsa moea. ’Me—’me ka linako tse ling le . . . “Rōna, re leka ho thusa bafumanehi. Re etsa seo re se khonang.” Oh, hoo ho itoketse, empa hona joale ha re bue ka seo. Re kena lekhatheng le leng.

. . . feteng . . . litaba tsa thuto . . .

<sup>81</sup> “Oh, e, re tsoere thuto ea Kreste. Re Mo lumela e ne e le Mora oa Molimo, o tsoetsoe ke moroetsana. Re lumela seo, ka lintho tsena tsohle.” Hoo ho babatseha feela.

<sup>82</sup> Empa, “Ho feta hoo, ha re feteleng kholong e tletseng.” Oh, khili! Eka nka be ke fuoe lentsoe la arekangeloi joale, ho e fihlisa moo le ka e bonang. Joale o re, “Ha re feteng litaba tsohle tsa thuto ea Kreste,” e—e baithuti bohle ba thutamolimo, le thutamolimo eohle eo re e tsebang, BoMolimo bohle ba Jesu Kreste, kamoo E neng e le Molimo o entsoeng nama, le lintho tse ling tsena tsohle.

<sup>83</sup> Pauluse o tsoelapele ho e hhalosa eohle mona, metsotsong e ’maloa feela. Ha re e baleng feela, nakoana feela, pele re fihla ho eona.

. . . ho thea metheo oa ho baka mesebetsing e  
shoeleng . . .

Joale, re lumela hoo.

. . . le tumelo ho Molimo,

Re lumela hoo.

. . . ‘Me hape oa thuto ea likolobetso, . . .

Feela kamoo re tlamehang ho kolobetsoa, re lumela hoo.

. . . le oa peo ea matsoho,

Re lumela peo ea matsoho. Ha ke re? Ua bona, hoo hohle, ehlide.

. . . le oa eona tsoho ea bafu, . . .

<sup>84</sup> Re lumela hoo. Joale shebang. Lea bona mona, “Kahlolo,” ho sebelisoa, “ea Kahosafeleng.” Ke kamehla. Molimo ha o bua ka kahlolo, ke ea kamehla. Hape, kamora hoba kahlolo e lihuoe poelano ha e sa le teng. Joale le ka utloisia lebaka

leo Molimo o ileng oa tlameha ho noa ka Sebele sa Oona—ka Sebele sa Oona, ka puo ea rōna, moriana oa Oona ka Sebele. Mohla O no o ahlolela motho sebe, tsela eo A ka boelanyang feela, e ne e le ho nka sebaka sa monna ka sebele sa Hae. Ke eona feela tsela ea hae ho boelangoa, kapa o khonneng ho re boelanya, e ne e le ka ho nka sebaka sa rōna le ho fetoha moetsalibe. Molimo, Jehova, oa fetoha moetsalibe, 'me Oa nehela bophelo ba Oona.

<sup>85</sup> Joale, o ka nehela bophelo ba hao, joaloka moetsalibe, ho shoela morero. Pauluse o buile, "Leha nka nehela 'mele oa ka secheso sa sehlabelo, ha ke letho," hoba e ke ke ea sebetsa. Ua bona, ha u shoa, ho felile ka uena. U shoa u le moetsalibe, o lahlehile.

<sup>86</sup> "Empa Molimo o theohile ka nama, oa ahlola sebe nameng, ka ho etsoa nama e tletseng sebe." Hobane, E ne e le Molimo oa Bosafeleng, eaba o tsosa 'mele oa Oona ka Sebele, ka hona Molokafatsi ke Eèna.

<sup>87</sup> Joale, lintho tsena tsohle, "A re feteleng phethehong," Pauluse o boletse. Joale ke'ng?

...oa kahlolo ea ho sa feleng.

...re tlil'o etsa joalo,...ha Molimo o re lumella.

(Temana ea 3.)

<sup>88</sup> Joale, "Ho fetela phethehong." Jesu o itse, "Le phethehe, joalokaha Ntata lona ea Leholidong a phethehile."

'Me rōna, e mong le e mong, re ahlotsoe. Ho sa natsoe seo re se etsang le ka mohla, re ahlotsoe. Re tsoetsoe, re ahlotsoe. Mama oa hao le papa ba hlahile, ba ahlotsoe. Uena, baholo ba hao bohle, ba tsoaletsoe sebeng, ba bopetsoe bokhopong. Ebe u ka e khona joang le ka mohla? U ka phetheha joang le ka mohla? Haeba u eso etse letho, u eso utsoe, u eso bue leshano, u eso etse letho bophelong ba hao, u sa ntse u ahlotsoe. U ne u ahloloe le pele u phefumoloha phefumoloho ea hao ea pele. U ne u ahlotsoe. Ka nèpahalo. 'Me u ne u tsuoe ke Molimo le pele u phefumoloha phefumoloho ea hao ea pele. Hoba u ne u tsuoe, ka takatso ea bong ea ntata'o le 'ma'o, bao ka ketso ea bona, ba u tlisitseng lefatšeng mona. 'Me Molimo o e ahlotsue, le tšimolohong. U ahlotsoe, le ho qaleng. Ka baka leo moo u... 'Me motho e mong le e mong holima lefatše o ne a ahloloe le uena. Joale ebe phetheho u tla e fumana kae?

<sup>89</sup> Sheba. A re phetleng ho Baheberu nakoana, khaolo ea 10. Mamela ka hloko. Ke batla ho bala ho se hokae ho tsoa khaolong ea 9, pele, temana ea 11.

*Empa Kreste moprista e moholo oa menono e tlang ho hlaha, ha a phollelitse ka tabernakele e fetisang ka boholo le ka botle, tabernakele ea Hae ka Sebele, nama ea Hae,...*

<sup>90</sup> Ua bona, tabernakele ea khale, u a lemoha, tabernakele ea khale e ne e kentsoe lesira ka ho eona, le patileng areka e leng bolulo ba Molimo. Ba tsebang hoo ba bakae? Ehlide. Be, tabernakele eo ea khale e entsoeng ke motho mona, ka likharetene tsa matlalo a takiloeng a lipōli, le lintho tse joalo, li ne li entsoe tabernakele e patang Sefahleho sa Molimo. Ba tsebang ho ne ho kena monna a le mong hang ka selemo ba bakae? [Phutheho e re, "Amen."—Mong.] Ruri. E ne e le Aarone, a kena hang ka selemo. 'Me o tšoanela ho tlotsoa. 'Me—'me, oh, tlhoko e kakang! 'Me o tlameha ho tšoara mollo letsohong la hae; 'me haeba a tsamaea a sa tšoara hoo, a eshoa hang ha a phetla lesira leo. O ne a oela fatše a eshoa. O tšoanetse ho kena ka mono a hotetse likandelare tsena, afafatse setulo sa mohau se neng se hooeletsa, mali a lefu, phapanyetsa, ho fihlela Kreste a khutla ho e etsahatsa.

<sup>91</sup> Joale, empa, eaba Molimo o kena kahara tabernakele ea mofuta o mong. 'Me tabernakele eo e ne e le Mang? Jesu. 'Me Molimo o no o le ka ho Jesu, 'me keha O patiloe, empa O ne o khutlisetsa lefatše ho Oona, ka boitsebiso ba Oona. Kreste o senotse Molimo. O itse, "Hase 'Na ea etsang mesebetsi. Ke Ntate oa Ka ea ahileng ka ho 'Na. Ha Ke etse letho ke Inotši haese seo Ke bonang Ntate a se etsa. Ntate ea leng ka ho 'Na, o Mpontša lipono tsena, 'me Ke tloha ho ea etsa seo Ntate a Mpoleletseng sona." Lea e tšoara? Molimo o no o le kahara 'mele oa motho, e seng ka morao ho matlalo a takiloeng a lipōli, empa o ne a phela, a tsamaea. Molimo o ena le matsoho; Molimo o ena le maoto; Molimo o ena le leleme; Molimo o ena le mahlo; 'me e ne e le Kreste. E ne e le Eo.

<sup>92</sup> Joale, O ile a tsamaea, eaba Moea o kena ka hara ntho eo, hore ka lefu la Hae A tle a phethisise Kereke le ho beha Kereke tlas'a bolaoli. 'Me oona Moea o nong o ahile ka ho Kreste o kahara Kereke, o etsa tsona lintho tseo Kreste a li entseng. "Ho se ho se hokae 'me lefatše ha le sa tla Mpona; empa lona le tla Mpona, hoba Ke tla ba le lona, le ka ho lona, ho isa bofelong ba lefatše."

<sup>93</sup> Joale mamelang sena.

*Empa Kreste o beoa moprista e moholo oa menono e tlang ho hlahla, ha a phollelitse ka tabernakele e fetisang ka boholo le ka botle, e leng e sa kang ea etsoa ka matsoho, ke ho re, eo e seng ea popo ena;*

Ha A etsoa ka matsoho. Ebe O ne a tsoaloe joang? Tsoalo ea moroetsana.

*E seng ka mali a liphooke le a manamane, 'mele ona ha o a etsoa sehlabelo kapa oa halaletoea, empa e leng ka mali a hae ka sebele . . .*

<sup>94</sup> Lea tseba mali a tsoa bong bo botona. 'Me ebe motho o re, "Oh, Jesu e ne e le Mojuda." E ne e se Mojuda. "Oh, re pholosoa ka mali a Mojuda." Che, ha re joalo. Efèla haeba re pholositsoe ka mali a Mojuda, re sa ntse re lahlehile.

Jesu e ne e se Mojuda, hape E ne e se Molichaba. E ne e le Molimo: Molimo Ntate, e leng Moea, Ea sa bonoeng. "Ha ho ea kileng a bona Molimo nakong efe, empa ea inotši ea tsoetsoeng ke Ntate o Mo tsebisitse." O ile a bonahatsa Molimo, seo Molimo o nong o le sona.

<sup>95</sup> Joale Kereke ea Hae e tlameha ho bonahatsa Molimo, ho bontša seo Molimo o leng sona. Ua bona?

Re etsa'ng? Rea itlhophisa, 'me, "Ha ke amane le *bona* ka letho. Bona ke Methodise. Bona ke Presbeteriene. Ha ke batle ho amana le *bona* ka letho. 'Na ke Baptise. 'Na ke Pentekosta." Huh! U lahlehile, ka merero ea mofuta oo. Hantle.

<sup>96</sup> Ea ka iphafang ke mang? Ea ka buang letho ke mang? Shebang sekhobo se tlisitsoeng ke Mapresbeteriene. Shebang sekhobo, Mabaptise. Shebang sekhobo, Katolike. Shebang sekhobo, Mapentekosta, Manazarene, Pilgrim Holiness. Ba shebeng kaofela.

Empa, ke le phephetsa ho supa ka letsoho le le leng, la sekhobo, nqa Hoo. Yaa. Supa ka monoana o le mong, mohla Molimo o Matlaohle o no o re, "Enoa ke Mora oa Ka eo Ke khahlisoang ho lula ho eèna. Mo utloeng." Ke Eèna eo. Ke Eena ea phethehileng.

<sup>97</sup> Joale, ha re baleng re tsoelepele hona joale.

*E seng ka mali a liphooko le...manamane, empa e leng ka mali a hae a sebele o kene hang feela sehalalelisong, 'me a etsa topollo e sa feleng... (Lea e tšoara?)... 'me a etsa topollo e sa feleng ea röna.*

<sup>98</sup> Hase ho lopolloa kajeno, ebe hape, veke e hlahlamang mohla tsoseletso e qalang, ho boela u lopolloa, ebe hape, oh, re oa mohaung re boele re lopolloe. U lopolotsoe hang feela, kamehla. Ke hantle. Haesale topollo, topollo, topollo. "Topollo ea Bosafeleng!" "Ea utloang Mantsoe a Ka 'me a lumela ho Ea Nthomileng, o na le Bophelo Bosafeleng, 'me a ke ke a tla kahlolong, empa o se a," lekhatle-le-fetile, "tlohile lefung ho kena Bophelong." Hobane a ile a tsokotseha? Hobane a kolobelitsoe ka mokhoa o itseng? Hobane a kopolitse mali letsohong la hae? "Hobane a lumetse ho Mora oa Molimo ea tsoetsoeng a inotši." Re fumana topollo ea Bosafeleng joalo.

<sup>99</sup> Mamelang joale.

*Hobane... esita mali a lipoho le a liphooko, le melora ea lithole e fokiloeng e—e... ho foka ba litšila ka eona, li hlatsoa ka nqeng ea nama:*

*Ana haele mali a Kreste, ea itlhahisitseng ho Molimo ka Moea oa kamehla e le pheko e se nang letheba, mali ao a re hlatsoitse matsoalo hakakang mesebetsing e shoeleng hore le tle le sebeletse Molimo o phelang?*

<sup>100</sup> “Ho falla lefung ho kena Bophelong.” U tsotella’ng ka seo lefatše le se nahantan? U tsotella’ng seo moahisane oa hao a se nahantan? Letsoalo la rōna le shoele, ’me re boetse re nchafalitsoe le ho tsoaloa labobeli ke Moea oa Molimo, ho sebeletsa Molimo oa ’nete le o phelang. Ke lona bao.

<sup>101</sup> Joale theohelang koana ho temana ea 10...khaolo ea 10, ke rialo, ka nqane ho leqephe hantle.

...molao erekaha o ne o na le seriti feela sa menono e tlang ho hlaha, e seng sebele sa lintho, o sitiloe ho tsoellisa ruri ho p-h-e-t-h-i-s-i-s-a morapeli ka mahlabelo ao a hlahisoang ka selemo se seng le se seng.

P-h-e-t-h-i-s-a, mono ke, “Phethisa.”

...a re feteng litaba tsa thuto ea Kreste tseo ho qaloang ka tsona, ’me re feteleng ho tsa kholo e tletseng;...

’Me joale phethehang, joalokaha Ntate lona... maholimong a phethethile.

<sup>102</sup> “Molao erekaha o ne o na le seriti sa menono e tlang ho hlaha,” litaelo le likolobetso le e...lintho tseo ba neng ba na le tsona tsohle, “li sitiloe ho phethisa morapeli.” ’Me, hape, Molimo o hloka “phetheho.”

<sup>103</sup> Ha u ingolisa le kereke ea Nazarene, e ke ke ea u phethisa le ka mohla. Ha u ingolisa le kereke ea Baptise, Pentekosta, e ka bang eng, e ke ke ea u phethisa. Ha u le monna ea lokileng, ea tsepehang, ho ke ke ha u phethisa le ka mohla. U ke ke ua sebeletsa ntho le e ’ngoe. Ha ho letho ka uena, ho rua. U lahlehole. U re, “Be, ke boloka molao. Ke boloka sabbatha. Ke boloka sena, litaelo tsohle tsa Molimo. Ke etsa sena.”

<sup>104</sup> Pauluse o boletse, “Ha re beelleng kathoko lintho tseo tsohle joale.”

<sup>105</sup> “Hoo ho itoketse, empa re tla etsa sena. Re tla kolobetsa batho, ’me re tla ba beha matsoho ho folisoa le lintho tse joalo.”

<sup>106</sup> Re ka e qotsa, temana ka temana, e ’ngoe le e ’ngoe ea lintho tseo. Kolobetso, rea e lumela. “Tšepo e ’ngoe, Morena o mong, Tumelo e ’ngoe, Kolobetso e ’ngoe.” Rea lumela hobane kolobetso e teng. Re lumela tsoho ea bafu. Ruri bo. Re lumela hore Jesu o shoele a ba a tsoha. Re lumela hoo. “Peo ea matsoho, ho bakuli,” ke seo e se buileng. “Mehlolo e tla tsamaea le ba lumelang ke oena ena. Ha ba beha matsoho holima ba kulang, ba tla fola.” Re lumela hoo.

Empa hoo ke’ng? Pauluse o buile, “Kaofela ke mesebetsi e shoeleng.” Ke se etsoang ke uena.

<sup>107</sup> “Joale a re feteleng phethehong.” Oh, khili! Re kena ka hara Tabernakele, e seng motheo; Tabernakele, Tabernakele ka boEona. Ke oona motheo: molao, le ho loka, le—le—le—le ho ngolisa kerekeng, le ho kolobetsoa, le—le peo ea matsoho. Tseo tsohle ke litaolo tsa kereke.

“Empa joale a re feteleng phethehong.” ’Me ea phethehileng o Mong feela, ke Jesu.

<sup>108</sup> Re kena joang ka ho Eēna? “Ka Bamethodise?” Che. “Pentekosta?” Che. “Baptise?” Che. “Ka kereke efe?” Che. “Kereke ea Katolike?” Che.

<sup>109</sup> Re kena joang ka ho Eona? Baroma 8:1.

*Ha ho le joalo ha ho sa le tsuo joale leha e le ’ngoe ho bao ba leng ho Kreste...e leng ba sa tsamaeeng ka lintho tsa lefatše lena, ka nama, ba mpang ba tsamaea ka lintho tsa Moea, ba sa tsotelle seo lefatše lena le se buang.*

<sup>110</sup> Leha u kula, ngaka e re, “U tlil’o shoa,” u se ke ua e tsotella, ha e u khathatse ka letho.

<sup>111</sup> Haeba ba re ho uena, “U tlameha ho fetoha Katolike pele u ka bolokeha, kapa Presbeteriene, kapa u tlameha ho fumana sena,” ha u e tsotelle ka letho.

“Ha ho le joalo ha ho sa le tsuo ho ba leng ka ho Kreste Jesu, ba sa tsamaeeng ka nama, lintho tseo ba li bonang.” Sohle seo u se bonang ka mahlo ke sa lefatše.

<sup>112</sup> Empa ke lintho tseo u li bonang ka moea oa hao, ka Lentsoe! Lentsoe ke ferekekere ea Molimo e halimisang seo A leng sona le seo u leng sona. Alleluia! Oh, khili! Le a u bolella. Ke eona feela Buka lefatšeng e u bolellang moo u tsoang teng, hore u mang, le moo u eang teng. Mpontšeng lehlaku lefe la sengoloa, hohle, le ka saense eohle kapa letho le sele, buka e ’ngoe le e ’ngoe e lokileng e kileng ea ngoloa, ha ho le e ’ngoe ka u bolellang. *Ena* ke ferekekere ea Molimo, e bontšang seo A leng sona le seo u leng. Hape, lipakeng mono ho fumanoa mochoporo oa Mali, u bontšang seo u ka bang sona ha u batla ho etsa khetho. Ke uena eo.

<sup>113</sup> “Ka Moea o le mong,” joale, Bakorinthe ba Pele 12. Re kena joang ka hara ’Mele oo?

“Ka ho tsukutla matsoho?” Che, monghali. “Ka ingolisa le kereke?” Che, monghali. “Ka ho kolobetsoa ka seetse, u kolumetse? Ka Lebitso la Ntate, Mora, le Moea o Halalelang? Lebitso la Jesu Kreste? Lebitso la Rose ea Sarone, Mohalalitoe oa Phula, Naleli ea Meso? Ntho efe eo u e batlang?”

Hoo ha ho amane le eona ka letho. “E mpa e le ho itlama ka letsoalo le letle nqa ho Molimo.” ’Me koana re pheha khang, rea ngangisana, rea kolokochana, rea arohana, re hlahisa liphapang. Ke hantle. “Empa kaofela ke mesebetsi e shoeleng.” Re fetela phethehong.

<sup>114</sup> Lintho tseo li etsoa ke 'na. Moreri o a u kolobetsa. Leha a u kolobelitse sefahleho se kolumetse, ka seetse, kapa hararo, hane, kapa hang, kapa e bang a e sebelitse joang, ha e amane le Eona ka letho. U mpa u kolobeletsoe setsoalleng sa kereke eo feela, le hona, ho kholisa kereke eo: u lumela lefu, kepèlo, le tsoho ea Kreste. Peo ea matsoho, ho folisa bakuli, hoo ho a babatseha, empa, ntho eohle ke ea hlaho, 'me 'mele oo o tla boela o eshoa ruri joalokaha u phela. O tla boela o eshoa. "Joale a re lahleleng lintho tseo tsohle ka thoko, re feteleng phethehong."

<sup>115</sup> Re fihlela phetheho joang? Ke seo re batlang ho se tseba.  
... Kreste o *phethisitse*...

"Molimo o Mo jarisitse makhopo a rona oohle. Athé O hlabetsoe libe tsa rōna, a tetekoa ka baka la makhopo a rōna, kotlo e re tlisetsang khotsø e Mo oetse holimo, re folisitsoe ka maqeba a Hae." Ke 'Mele oo re batlang ho fihla ho oona. Ke oona 'Mele. Hobaneng? Ha u le kahara 'Mele oo, u ke ke ua bona kahlolo, u ke ke ua latsoa lefu. U lokolotsoe lefung lohle, kahlolong, sebeng, le nthong eohle e sele, ha u le ka hara 'Mele oo.

<sup>116</sup> "U kena joang ka hara Oona, moreri? Ka ho ingolisa le tabernakele ena?" U sa lahlehile, le joale. U ke ke ua ingolisa, le hona; ha re na buka ea letho. "Re kena joang ka ho Oona? Ka ho ingolisa le kereke e itseng?" Che, monghali. "U kena joang ka ho Oona?" U tsoalloa ka ho Oona.

<sup>117</sup> Bakorinthe ba Pele 12.

*Hobane ka Moea o le mong bohle re kolobeletsoa 'meleng o le mong, ...*

<sup>118</sup> Ka kolobetsø ea Moea o Halalelang, re kolobeletsoa 'Meleng oo, 'me re lokolotsoe sebeng. Molimo ha u sa hlola o u bona; O mpa a bona Kreste. 'Me ha u le ka hara 'Mele oo, Molimo a ke ke a ahlola 'Mele oo. O se a O ahlotse. O ipelesitse likahlolo tsa rōna oa re memela kahare. 'Me ka tumelo, ka mohau, re kena ka hare, ho amohela teballo ea rōna. 'Me Moea o Halalelang o re kenya ka hara setsoalle sena le Eèna. "Me ha re sa sala lintho tsa lefatše morao, re mpa re tsamaea ka Moea."

Ho tsosoa, Lentsoe le tlie ho rōna. O shoele sebakeng sa ka. Ke phelisitsoe. Ke 'na enoa, ea na beng a shoele sebeng le littolong, ke phelisitsoe. Litakatso tsa ka tsohle ke ho Mo sebeletsa. Lerato la ka lohle le ho Eèna. Metsamao ea ka eohle ke e batla e etsoa ka Lebitso la Hae, hore hohle moo ke eang teng, sohle seo ke se etsang, ke tlotlisa Eèna. Ha ke tsoma, ha ke tsoasa lihlapi, ha ke bapala bolo, ha—ha ke... sohle seo ke se etsang, e ka khona e be, "Kreste ka ho 'na," bophelong ba mofuta oo, bo tla lakatsisa batho ho ba joalo; e seng ho gefetha, ho seba, le ho pheha khang ka likereke tsa lona. Lea e tsoara na? [Phutheho e re, "Amen."—Mong.]

"Ka Moea o le mong re kolobeletsoa 'Meleng oo." "'Me ha Ke bona Mali, Ke tla le feta holimo."

<sup>119</sup> Mamelang. Ha re baleng re tsoele pejana feela mona, hlen.  
 . . . se ne se ka sitoa *ho phethisa* morapeli.

Temana ea 2, khaolo ea 10.

*Hola ha ho joalo ha ke re a ka be a lesitsoe ho hlahisoa?*

<sup>120</sup> Hola a phethahatsa motho...Athe Molimo o hloka phetheho. Hola ho boloka litaelo, hola ho etsa ka melao eohle, ho ka u phethahatsa, ke moo ho sa hloleng ho—ke moo ho sa hloleng ho hlakoa letho le sele; kaha u se u phethahetse. Hobane, ha u phethahetse, u boleng ba Bosafeleng. Hoba, Molimo ke Bosafeleng o Inotši, 'me Molimo o phethahetse o Inotši. 'Me mokhoa oa hao oa ho fetoha Bosafeleng, ke ka ho fetoha karolo ea Molimo. [Sekheo lebanteng—Mong.]

. . . *ha ba se ba hlatsoehile . . . ba ke ke ba hlola ba sa na le letsoalo la sebe.*

Eng? “Morapeli ha a se a hlatsoehile, ho se hhole a sa na le *letsoalo* . . .” Ha u ka ngola phetolelo ea eona, ke “takatso.”

. . . *barapeli ha ba se ba hlatsoehile . . . ha a sa na takatso ea sebe.*

. . . efèla morapeli hang *ha ba se ba hlatsoehile . . .*

<sup>121</sup> Joale u nyoloha u re, “Oh, alleluia, ke pholositsoe maobane. Empa, be, ho bokoe Molimo, ke *eēna* ea nkhopisitseng ho oa mohaung. Alleluia, ka tsatsi le leng ke tla boela ke pholosoa.” Mofo tooe ea tingoeng koetliso. Litaba ha lia ema joalo.

<sup>122</sup> “Morapeli ha a se a hlatsoehile ha a sa na takatso ea sebe,” Bibebe e itsalo. Mamela, ha re bala re tsoelapele, motsotsotso feelsa.

*Empa mahlabelong ao . . . a ntse a hopoloa selemo ka seng khahlano le sebe.*

<sup>123</sup> Joale re tlil’o theoha, re tšoarane le temana ea 8, ho baballa nako, etsoe ke batla ho finyella teng.

*Ha a setse a bile a boletse pele a re, Ha o a ka oa rata lihlabelo le linyehelo le licheso . . . a etsoang ka baka la sebe, 'me ha u a oa khahlisoa ke tsona; athe ke tsona ntho tse hlahisoang ke molao;*

<sup>124</sup> Temana ea 9.

*Ke moo a itseng, Bona, oho Molimo, ke tlide ho etsa thato ea hao. Ha a rialo o felisa . . . ho tlosa . . . Ha a rialo o felisa sa pele, e leng molao, 'me o hloma sa bobeli.*

<sup>125</sup> Ekare nako ea ho likalika moo e ka ba teng. Ha u itulela u le Presbeteriene, kapa Pentekosta, kapa Baptise, kapa Methodise, O sitsoa ho etsa letho ka uena. O tlameha ho felisa hoo hohle, hoa pele, ua bona, A tle a hlome sa bobeli. Ha u lula u re, “Be, ke Methodise.” Ah, ha se taba ea letho e

khahlano le Bamethodise, kapa Mabaptise, kapa Pentekosta. Empa, moena, hase—hase eona taba e toboketsang. U tlameha ho fetela phethehong, e leng ka ho Kreste.

<sup>126</sup> Sheba sena joale, motsotsso feela.

*Ke ka eona . . . re halalelitsoeng ka sehlabelo sa 'mele  
oa Jesu Kreste se entsoeng hang.*

<sup>127</sup> Huh? A re balleng pejana, le e tšoare. E re e thophothole re sa bala, “Hang.”

*Haele moprista e mong le e mong o ntse a eme ka  
matsatsi oohle ho sebeletsa ho hlahisa khafetsa  
sehlabelo a le mang, a sa tsebeng le hanyenyane ho  
tlosa sebe:*

*Empa eèna, . . .*

Na le itokisitse? Joale le butse veste ea lona, e tle e se thelle, e tla theohela pelōng hantle? “Empa Monna enoa.” Monna ofe? E seng mopapa oa Roma, e seng bishopo ea kerekē ea Methodise, kapa kerekē efe.

*Empa eèna, Kreste, hobane a hlahise sehlabelo se le  
seng ka baka la sebe, o ituletsa ka ho sa feleng ka  
letsohong le letona la Molimo;*

*A lebeletse ho sa ntseng ho tla etsahala e leng hore bao  
e leng lira ho eèna ba beoe bonamélo ba maoto a hae.*

Shebang. Ke enoa a fihla.

*Hobane ka sehlabelo se le seng o  
p-h-e-t-h-i-s-i-t-s-e, o phethisitse . . .*

“Hofihlela tsoselatso e latelang”? Ebe e itseng?

*. . . o phethisitse ka ho sa feleng bao a ba  
halalelitseng.*

Lea e tšoara na? “A re feteleng phethehong.”

<sup>128</sup> Joale lona batho ba khalalelo le re, “Oh, yaa, re lumela khalalelong. Alleluia! Re lumela hlatsuong.” Empa le ipatlela ea lona. U tèla sena 'me u tèla sane. U a tseba hore ha u a lokela ho etsa hoo.

Haese Kreste ea u buletseng monyako ho le phelisetsa pelō ea hao, 'me u fihla moo sebe se shoeleng, le takatso, hohle ho felile. Hape, O tlositse toka ea hao, hore A tle a thee Eèna ka ho uena. “Me ke Kreste, Mora Molimo, ka ho uena, tšepo ea Khanya.”

*. . . ha re feteleng phethehong;*

<sup>129</sup> Ebe re ka phetheha joang? Ka lefu la Kreste. E seng ka ho ingolisa le kerekē. Ha se ka mesebetsi ea rōna e mettle, seo re se etsang. Hoo ho itoketse. Ha se kahobane re kolobelitsoe ka tsela *ena* kapa ka tsela *eane*. Ha se kahobane re folisitsoe, ka peo ea matsoho. Ha se ka baka la lintho tse ling tsena tsohle, “Re lumela lefung, kepèlo, le tsoho.”

<sup>130</sup> Pauluse o itse, “Leha nka bua ka puo ea batho le ea Mangelo,” tseo ke lipuo tse utloisisoang le lipuo tse sa utloisisoeng, tse lokelang ho koaholloa, “Ha ke letho. Leha nka rua tsebo ea ho utloisia bohlale bohole ba Molimo,” nka hlalosa Bibebe, ho tloha...ho e lohanya ‘moho, “Ha ke letho.” Ho tsamaea sekolo ha ho thuse hakaalo ke hona, ha ke re, ho ithuta Bibebe? “Leha nka rua tumelo e ka suthisang lithaba...” Matšolo a pholiso ha a bue hakaalo ke hona, ha ke re? “Ha ke letho, leha nka tela ‘mele oa ka hore o chesoe e le sehlabelo.”

<sup>131</sup> “Oh,” ba re, “monna eo ke morapeli.”

<sup>132</sup> “Empa ha se letho,” Pauluse o itse, “le joale ha eso be letho.”

<sup>133</sup> “Hoba lipuo, li tla lesa ho ba teng; liporofeto le tsona, li tla hloleha; lintho tse ling tsena tsohle, li tla hloleha. Empa mohla ho hlahang phetheho, ke moo se leng ka nqa e le ‘ngoe feela se tla felisoa.” Ua bona, hono “phetheho.” Ho phethehileng ke hofe? Lerato. Lerato ke’ng? Molimo. “A re ke re lahleng mesebetsinyana ena e shoeleng le litaeloana, re feteleng phethehong.” U a e bona? Re phethisisoa ka Kreste. Ebe re kena joang kahara Oona? Ka kolobetso ea Moea o Halalelang.

<sup>134</sup> “Ho lokile, ebe ho etsahalang?” U tlohile lefung ho kena Bophelong.

<sup>135</sup> “Be, na kea tsukutleha, kea qhoma, ho e finyella?” Uena, ha u tlameha ho etsa letho. U se u entse hoo, Molimo o u fallisitse ho tloha lefung ho kena Bophelong, ‘me u a phela. Ke moo litholoana tsa bophelo ba hao li e supang.

<sup>136</sup> Boholo ba lona Bamethodise le Manazarene le kile la hlabo litlase tse matla tsa bokhoni ba lona, le ntse le utsoa mabele a tšingoana ea monna e mong, ke hantle, le etsa tsohle tse ka etsaang.

<sup>137</sup> Boholo ba lona Mapentekosta le buile ka lipuo, joaloka linaoa ha li tšeloa holima lekoko la khomo, ehlide, le tsoe le hloaele le mosali oa monna e mong, ho etsa lintho tsa mefuta. Ha se Eona, moena.

<sup>138</sup> Le se leke ho arubetsoa ke tšisimoho kapa letho ho fapanyetsa Moea o Halalelang. Mohla Tsoalo e ncha e ttileng, u fetotsoe. Ha u a tlameha ho etsa letho ho e paka. Bophelo ba hao bo a paka, ha u tsamaea. U lerato, khotsa, mamello, mosa, bonolo, tiisetso. Ke seo u leng sona, ‘me lefatše lohle le bona khalimiso ea Jesu Kreste ka ho uena.

<sup>139</sup> Joale, ho bua ka lipuo, ho hlabo litlatse ka mono, ke litholoana tse latelang Bophelo ba mofuta ona.

‘Me u ka kopitsa, ua etsisa litholoana tseo, le joale u ntse u sa rua Bophelo boo. Rea e bona. Ba tsebang hoo e le ‘nete ba bakae? [Phutheho e re, “Amen.”—Mong.] Ehlide, u ka khona. Ruri, ho joalo bo. Khele! U ka e bona mathokong a hao.

<sup>140</sup> Ka hona, ha ho letho leo u ka le bitsang bopaki ba Moea o Halalelang, haese ka bophelo boo u bo phelang. Joale, hola u batla ho bua ka lipuo, hoo ho itoketse ka bottlalo ha u phela bophelo ho e tšehtesa. Ke hantle. 'Me ha u batla ho hlaba litlatse, ke botle, ho itoketse. Le 'na ke hlaba litlatse, hape, ka linako tse ling ke thaba hoo ke batlang ke sa khone ho roala para ea lieta; ke batla ho tlola ke tsoa hara tsona. 'Me hoo ho a babatseha. Kea e lumela.

<sup>141</sup> Ke bone lipono, le bakuli ba folisoa, le bafu ba tsosoa. Mohla ba rapaletseng mono lingaka li ngalile li re, "Ke phetho ho felile ka bona," ho robala mono lihora tse 'maloa; ebe Moea o Halalelang o theoha o hlahisa pono, ho theohela mono le ho tsosa motho eo. Ke bone litholo, limumu, le lifofu, le liritsa, li tsamaea. Hoo ha ho . . . Ke litholoana feela.

<sup>142</sup> Moena, khale nako e fetileng koana, le pele lefatše le theeloa motheo; Molimo ka mohau oa Oona oa Bosafeleng, O ile a sheba tlase, 'me ka boitsebelopele Oa bona 'na le uena. Oa tseba mongoaha oo re tlang ho phela ho oona. Oa tseba seo re tlang ho ba sona. Ka baka leo, ka khetho, Oa re khetha pele ho theoa lefatše, ho hlaha le Oona re se na letheba.

<sup>143</sup> Joale, efèla ha O re khethile pele ho motheo oa lefatše ho lula ka ho Oona re se na letheba, athe bohle re tsoetsoe re le matheba, 'me ho se letho le ka . . . ho se letho ho re hloekisa, re ka lula joang re hloka . . . re tla lula joang re se na sekoli? "O romile Mora oa Oona ea tsoetsoeng a inotši, hore mang le mang ea lumelang ho Eèna a se be le qetello ea bophelo, empa ho ba le Bophelo Bosafeleng; a se ke a timela, empa ho rua Bophelo Bosafeleng." Ebe ha re kena ka ho Eèna, ka tumelo, re pholosoa ka mohau, ka Moea o Halalelang o re bitsang.

<sup>144</sup> Le pele 'mele o fihla holima lefatše lena, mebele ea lona e ne e robetse mona. E ne e bopiloe ka khalsiamo, potashe, mongobo, leseli la khosmiki—khosmiki, le lipetroleamo, le tse joalo, lielemente tse leshome le metso e tšeletseng. Eaba Moea o Halalelang o qala o fuama lefatše, "o bitsa." Eare O sa etsa, ntho ea pele u a tseba, ha hlaha palesa e nyenyane ea Paseka. Eaba O fuama o hlahisa joang, le linonyana tse itseng, 'me ka mora nakoana, ha hlaha motho.

<sup>145</sup> Joale, ha O a etsa mosali ka lerôle la lefatše. E se e le monna, le ho qaleng; monna le mosali ba bang. Ka hona O ngoathile lephakong la Adama, lehopo, ho etsa mosali, molekane oa hae. 'Me eaba sebe sea kena. Eare hoba sebe se kene . . .

<sup>146</sup> Molimo ha o ka ke oa hloloa, ho sa tsotelehe se hlhang. Ha O ka ke oa hloloa. Eaba, basali ba qala ba hlahisa banna holima lefatše. 'Me Molimo, ka mohau oa Bosafeleng, o bone ea tlang ho bolokeha, 'me Oa u bitsa. "Ha ho ea ka tlang ho 'Na, a sa bitsoe ke Ntate oa Ka, pele." "Ha se ea batlang, kapa ea mathang, empa e le Molimo o hauhelang."

<sup>147</sup> U re, “Be, ke ’na ea batlileng Molimo. Ke ’na ea batlileng Molimo.” Che, lekhale ha se uena. Ke Molimo o u batlileng. Le tšimolohong ho bile joalo.

<sup>148</sup> E ne e se Adama ea itseng, “Oho Ntate, Ntate, ke sitiloe. U ho kae na?”

<sup>149</sup> E ne e le Ntate ea reng, “Oho Adama, Adama, u ho kae na?” Ke eona tlhaho ea motho eo. Ke lefutso la motho leo. U bopiloe joalo.

<sup>150</sup> “Me ha ho ea ka tlang ho ’Na a sa huloe ke Ntate. ’Me bohole bao Ntate a ’Neang bona...” Alleluia! “Bohole ba tlang, Ke tla ba nea Bophelo Bosafeleng, ’me Ke tla mo tsosa letsatsing la bofèlo.” Ke pallo e bokoang, e bokoang hakakang, ea Molimo oa Lehолимо! Moo re tla fihla teng bosiung bona, moo, “O anneng ka Oona.” Ha ho ea fetang ka boholo. U ana ka motho ea u fetang ka boholo. Ha ho ea fetang ka boholo, ka hona Molimo o anne ka Oona. Re kena ho eona, kamoo O e sebelitseng mohla O nong o e etsa; le ho ana ka Oona, hore O tla re tsosa le ho re fetola lefa la Oona ka Sebele.

<sup>151</sup> Oh, re ka ema ka phetheho le ka ho tiiea ha kae, hoseng hona! Kamoo u ka shebang, haeba lefu le u tjametse sefahlehong, u ka bua joaloka Pauluse, “Lefu, tsenene ea hao e kae? Lebitla, ho hlola ha hao ho kae? Empa ho lebohuoe Molimo, O re fang tlholo ka Morena oa rōna Jesu Kreste.” Ke lona bao. Hobaneng?

<sup>152</sup> “Oh, u entse *hore-le-hore*.”

<sup>153</sup> “Kea e tseba, empa ke khurumelitsoe ke Mali a Hae.” Alleluia!

<sup>154</sup> “Ka Moea o le Mong, re kolobeletsoa bohole ’Meleng o le mong.” Lona Bamethodise, Mabaptise, Mapresbeteriene, le ka bang eng, re kolobeletlitsoe ’Meleng o le mong. Re na le setsoalle, ’me re baahi ba ’Muso oa Molimo, ba ipolelang, ba re, “Ha re ba lefatše lena.”

<sup>155</sup> Ngoananyana oa ka o tlide, tsatsi le leng, ha thoe, “Ntate, ngoananyana enoa o entse *hore-le-hore*. ’Me ba entse *hore-le-hore*. Re ile ra tlaha ra ea lapeng. ’Me ba entse *hore-le-hore*.” Ka re...Ha thoe, “Hobane’ng rōna re sa etse joalo?”

<sup>156</sup> Ka re, “Moratuoa, ha re ba lefatše leo. Ba phela lefatšeng la bona.”

<sup>157</sup> Ha thoe, “Na ha re tsamaee holima mobu o le mong?”

<sup>158</sup> Ka re, “Ka nqa ea lefatše, moratuoa. Ha re bang le batho bao.”

<sup>159</sup> Bibele e itse, “Tsoang ho bona, le khethehe,” ho bolela Molimo. Ua bona, ha le ba lona. ’Me Tlhaho e ncha eo ha e kena ka ho uena, ha u a tlameha ho ntšoa. Ha u sa batla ho

khutlela morao, joaloka mosali oa Lota. U mpa u tsoaletsoe, ka ntle ho eona. 'Me u selikalikoeng se seng. 'Me ho uena ekare thotobolo.

'Me ntho ena, e kholo, Amerika ena ea litoro eo re phelang ho eona, e fetohile tšenyeho e kholo. Ntho e 'ngoe le e 'ngoe ke takatso le basali. 'Me moaparo oa basali, boitšaro ba banna, le—le lintho tseo ba li etsang, ebe ba ipitsa, "Bakreste."

<sup>160</sup> Ho tea mohlala, Elvis Presley enoa, o a kena o ingolisa le kereke ea Pentekosta joale. Hoba, ke hona moo Judase a ithuetseng likoto tse mashome a mararo tsa silifera. Elvis o ruile letoto la li-Cadillac, le e—le limilione tse 'maloa tsa didolara, ka ho rekisa ka boholo ba hae. Arthur Godfrey. Shebang hoo.

<sup>161</sup> Shebang Jimmy Osborne koana Louisville, ka ntle mono ka boogie-woogie eo ea khale, rock-and-roll, matlakala a khale le litšila. 'Me ka Sontaha hoseng, ba tšoara Bibele ba ema kalaneng ba rera. Lihlong tse kae!

Ha ho makatse Bibele e itsese, "Tafole e 'ngoe le e 'ngoe e tletse mahlatsha." Khele, re phela letsatsing le lebe!

<sup>162</sup> 'Me batho ba re, "Oh, ehlide ke barapeli." Oh! Ana ha u tsebe diabolosi o tletse borapeli? Na ha u tsebe Kaine e ne e le morapeli ea tšoanang le Abele? Empa, o ne a se na Tšenolo. Ke eona. O ne a se na Tšenolo.

Yaa, bohole re tsamaea kereke, empa ba bang ba ruile Bophelo, bao ke ba ruileng Tšenolo ea Jesu Kreste pelōng ea bona. E seng ka ho tsukutleha, ho qhoma, ha se ka ho ingolisa kerekeng. Empa, Tšenolo, Molimo o Mo senotse.

<sup>163</sup> Shebang se boletsoeng, "Batho ba re 'Na, Mora motho, ke mang?"

<sup>164</sup> "Ba bang ba U bitsitse 'moporofeta.' 'Me ba bang ba U bitsa 'Eliase.' 'Me ba bang . . ."

Ha thoe, "Empa lona le reng?"

<sup>165</sup> Petrose a re, "U Kreste, Mora Molimo o phelang." E ne e sa tsoe melomong ea hae.

<sup>166</sup> A re, "U lehlohonolo, Simone, mora Jonase, hoba hase nama le mali a u senoletseng hona. Ha u a ithuta sena ka taeloana e itseng—e itseng ea Bibele, kapa ka thupello e itseng ea thutabolumeli. U lehlohonolo, hoba hase nama le mali a u senoletseng sena. Empa Ntate oa Ka ea Lehelimong o e senotse. 'Me holima lejoe lena ke tla haha Kereke ea Ka, 'me likhoro tsa lihele li ke ke tsa E hlola."

<sup>167</sup> Ha u le Mokreste, hoseng hona, hoba u le setho sa kereke, u lahlehile. Ha u le Mokreste hoba u tlohile lefung ho kena Bophelong, u lokolotsoe kahlolong; ka ho Kreste, u ntse u phethahala ka linako tsohle. Molimo ha u khone ho bona letho. U re, "Be, na ke tla etsa phoso?" Ehlide, empa ha u e etse ka boomo.

<sup>168</sup> Joale re tla kena ho eona, metsotsong e 'maloa, "Hobane ea etsang sebe ka boomo hoba a neoe tsebo ea 'Nete, ha ho sa le seholabelo se mo saletseng sa sebe." Re tla kena ho eona bosiung bona, hoba hona joale nako e batla e tsamaile.

<sup>169</sup> A re baleng litemana tse 'maloa tsa sena, re tle re ikutloe re thabile ho feta ka ho theohela tlasana ho feta. Ho lokile. Be, re tla qala ka eona hantle bosiung bona, temana ea 4. Mamelang sena.

*Hobane ba seng ba kile ba bonesetsoa, ba etsoa...  
'me ba se ba entsoe...ba latsoitseng matla, lineo tsa  
leholimo, ba filoeng kabelo Moeeng o Halalelang,*

*Ba...latsoitseng lentsoe le monate la Molimo, le  
matla a bophelo bo tlang ho tla,*

*Bao ha ba ka oa, ha ho kamoo ba ka boelang ba  
nchafatsoa kateng hore bao ba boele...nqa ba bake;...*

Ua bona? 'Me taba eo re e kenya ho Baheberu 10, ho ea pele le morao, ho supa seo e leng sona.

<sup>170</sup> Metsoalle, "A re feteleng phethehong." Re na le...ha re... Re hloka boitatolo kajeno. Ha re na boitatolo, ba letho. Molimo oa Leholimo o ipontšitse letsatsing lena la ho qetela oa ba oa etsa tsona lintho tseo O li entseng mohlang oo, mohla O ne o le koano pele, mohla O no o le holima lefatše. O pakile, re sa feta Bibeleng ena. 'Me lona—lona, tlelase, le tseba sena, hore re nkile mohlolo ka mohlolo, le pontšo ka pontšo, le moeka ka moeka, e leng tseo O li entseng ka bana lefeelleng, lintho le lipontšo tseo O li entseng; lintho tseo O li entseng mohla O no o le mona holima lefatše, oa bonahatsoa ka nama; 'me tsona lintho tseo li etsahala kajeno, hantle mona hara rōna. Lentsoe le e netefatsang ke lena. Ntho e nèpahatsang hoo ke ena, ho e nèpahatsa. Moea oa Molimo o etsang hoo ke oona, ka baka leo ha re na boitatolo.

A re rapeleng.

<sup>171</sup> Ntate oa Leholimo! Le rōna ha re teetsoe hare ke leru le lekalo la lipaki, a re ke re lahleng lentsoe ka leng, ntho ka 'ngoe, bobe ka bong, lentsoe ka leng le lebe, lentsoe ka leng le builoeng hampe, mohopolo o mong le o mong, "'me re ke re mathe ka sebete peisong eo re e beetsoeng, re ntse re talimile moqali le mophethi oa tumelo ea rōna, Morena Jesu Kreste." Oho ho bokoe Lebitso la Hae le ke keng la lekanngoa le halalehileng! Kamoo A tlileng lefatšeng ho lopolla motho ea oeleng, le ho ba khutlisetsa setsoalleng sa Morena Molimo. 'Me re U leboha ka sena. 'Me joale ka mohau oa Hae... Hase rōna ba Mo khethileng, empa O re khethile. O itse, "Hase lona le Nkhethileng, empa ke 'Na ke le khethileng." Neng? "Pele ho motheo oa lefatše."

<sup>172</sup> 'Me, Molimo o ratehang, ha ba le teng ba lutseng mona hoseng hona, mohlomong esale ba e lebalisa lilemo le lilemo,

empa ho kokota ho ho nyenyane ho fihlile pelōng. Mohlomong ba ingolisitse kerekeng, ba nahana, "Be, ho tla itokela." Ntate, ehlile, Mangolo a e hhalositse hoseng hona: hore u ka sitoa ho ipata ka morao ho kereke, 'me oa loka; le joalo u ke ke ua loka, u sa bue leshano u sa etse eng le eng e mpe, 'me u ntse u lokile.

<sup>173</sup> Ho loka ha rōna ho hong feela, hase hoa rōna, empa ke ho loka ha Hae. Ke Eèna ea phethisitseng pholohoa rōna. Ka baka leo, ka ho ba ka ho Eèna, Molimo ha o bone liphoso tsa rōna. Ha re etsa letho le phoso, moea o hooeletsang o teng ka ho rōna, "Oho Ntate, ntšoarele!" Ke moo Molimo o sa e boneng. Ke... Re kenngoa setsoalleng le mohaung 'moho le Eèna. Aba sena, Morena, re sa koala tšebeletso, ka Lebitso la Kreste. Amen.

<sup>174</sup> Ka nakoana feela, ke batla ho le botsa. Ho sa tsottelehe seo u se etsang, u lahlehile. Mamelang sena. Ha se khale haholo... Ekaba ke e phethile pele. Ke ile ka hlaheloa ke nthoana ena.

<sup>175</sup> Ke ne ke le holimo koo—koo Toledo, Ohio. Ke tšoarane le tsoseletso 'me—"me ke tšoere kopano tlase mono ea batho ba bangata. Ba ne ba tseba moo lihotele li leng teng; ka hona ba nkisa kantle ho motse. Ka lula kantle mono, kahara motele o monyenyane.

<sup>176</sup> Esale re jela reshurenteng e nyenyane ea Dunkard. E ne e le tulo e khabane, mafumahatsana a mono, e le Bakreste 'me ba shebeha e le bahalaleli, ba hloekile 'me ba le mosa. Sontaha ka tla, ke ile ka lapa. Ke ne ke itimile lijo nakoana. 'Me ke batla ho tšeleta seterateng se seng, ho odara nthoana. Tselana e pela mothinya mono, 'me teng ho ahiloe tuloana ea tloaelo, e tloaelehileng, ea Amerika mono, ho ja. Nthoana, e tulonyana, khefi, e buloang bosiu bohle. Eitseha ke kena ka mono Sontaha seo, ekaba hora ea bobeli thapama, pele ke ea rera thapama eo, ke ile ka tšoaroa, ke sa tsebe seo nka se etsang.

<sup>177</sup> Ka kena kahare, 'me ntho ea pele ka bona mosetsana ea ka bang lilemo tse leshome le metso e tšeletseng, tse leshome le metso e robeli, moratuoa oa ntate ea itseng, moratuoa oa mama ea itseng, a eme motše mono le moshanyana, a itšoere letheka. Mono ho lutse sehlopha sa bacha pela e—pela khountara.

<sup>178</sup> Ka utloa ho ketema ha machini oa seloto. Ka sheba *mona*, keha lepolesa le eme le haretse mosali ka sephaka sa lona, holimo mona, lethekeng la hae, 'me le bapala machini oa seloto. Joale, lea tseba ho mokola le ho bapala machini oa seloto ke tlolo molao Ohio, ho lona batho ba Buckeye mona. 'Me lea tseba ke tlolo ea molao. Athe molao e ke ona, o bapala machini oa seloto; monna e le thaka ea ka, mohlomong a nyetse, a ena le sehlopha sa bana, ekaba ntatemoholo. Lepolesa, le ntseng le hlahloba, le bapala machini oa seloto. Mothaana eo a eme mono... Mocha eo o entseng? Hona ho entseng?

<sup>179</sup> Ka ema mono. Ha ho mang ea mponeng ke kena, keha ba le maphathe haholo, halofo ea bona e tahiloe. Ka hona, ka

shebella. Ka utloa motho ea reng, “Be, u nahana pula e ka ssitisa rhubarb?” ’Me ka sheba nqa ena, ’me mona keha ho lutse leleiti mono, leleiti le holileng, a hlile . . . A le mashome a tšeletseng a metso e mehlano, mashome a supileng, a atametse mono. ’Me leleiti la batho . . . Ha ke qose motho ea batlang ho shebahala. Empa eitseha a . . . Keha a itokisitse, moriri o le bolou, bobolou bo tebileng. O hlile o kutiloe, ka holimo, ’me o takiloe bobolou bo tebileng. ’Me a hlile a pharile manicure hatenya, kapa le e bitsang nyee eo e netoang sefahlehong sa hae, le matheba a maholo. ’Me keha a khoesitse lishoto tse nyenyane tse sa tsebisahaleng, ’me mothoana oa batho a sosobane hoo nama, menephe, nama e bile e leketla *joalo* holima meomo ea hae. ’Me keha a tahiloe. Mono a lutse le monna ea holileng, ’me e le lehlabula, ka nthoana ena ea khale, a apere jase e khoarahlana ea masole, kapa olive drab. E lepeletse *joalo*, molala o hariloe moronono oa sekhafo. A tahiloe, bobeli ba bona, ’me ba tsamaea le mosajana enoa ea holileng.

<sup>180</sup> Ka ema mono ’me ka qamaka. Ka re, “Molimo, ebe U ka e mamella joang? Eng—eng . . . Ntho ee U ka e sheba joang? Haele moo, ’na, moetsalibe ea pholositoeng ka mohau, ke nahana hoo, ebe U ka—ka e shebella joang? Khele, ekare U ka tloha oa le phatlola oa le ahlamisa. Na Rebeka oa ka e monyenyan le Sara ba tla tlameha ho arubetsoa ke tšusumetso ea mofuta oo? Na banana ba ka babeli ba tla tlameha ho kopana le e—e lefatše le tummeng, le tsejaong joalo, la maemo a tjena kajeno, moo batho ba itšoereng joalo? Molimo, nka khona joang le ka mohla . . . ebe nka etsang”

Hoba, ke mohau oa Oona. Efèla ha ba reretsoe Bophelo Bosafeleng, ba tla tla ho bona. Haeba ba sa etsoa, ba ke ke ba khona. Ha ke tsebe. E itšetlehile ka Molimo. Ke tla phetha kabelo ea ka.

<sup>181</sup> Ka nahana, “Molimo, ebe U ka e emela joang? Ekare U halalela hoo U ka e fielang holima lefatše.” Ka re, “Sheba nkhono eo oa batho ea lutseng mono. Sheba ngoanana eo oa batho morao mono. ’Me mona ho eme mosali, a ka ba lilemo tse mashome a mabeli a metso e mehlano. ’Me lepolesa leo le haretse letheka la hae ka liphaka tsa lona, le bapala machini oa seloto. ’Me molao ke *ona*; ho felile ka sechaba. Bommè ke *boo* bo felile. Batho ba holileng ke *bana* ba felile. ’Me morao *mono* ho lutse mosetsana, ’me ho felile ka eèna. Sheba bashanyana, athe ba tlamehile ba be ba le kahara kereke nqa e ‘ngoe.”

<sup>182</sup> Ka re, “Oho Molimo, ebe nka etsang? ’Me ke ’na enoa kahara motse ona, ke hlaba mokhosi ka pelō ea ka eohle, ’me ba o nyemotsa ba tloha ba ikela eka ba . . .” Ka nahana, “Be, Molimo?”

<sup>183</sup> Be, eaba ho fihla mohopolo, “Ha Ke sa ba bitsa, ebe ba ka tla joang? Bohle bao Ntate a ’Neileng bona ba tla tla. ‘Le na le mahlo athe ha le bone, litsebe athe ha le utloe.’”

<sup>184</sup> Ka nahana, “Be, hola Presidente a ka tla motseng sebakeng sa tsoseletso, ho ka tsoa mang le mang. Oh, ehlide, oo ke mokhoa oa lefatše.”

<sup>185</sup> Ka ntano nahana, “Be, Molimo, joang, hobaraneng Uena feela, be, u sa tle, oa romela Jesu ebe re qetile ka eona? Na ho ke ke ha qetoa feela—feela ka eona, ‘me ea tloheloa?’”

<sup>186</sup> Eba ke qala ke bona ntho e phethohang ka pela ka. Eakare setsokotsane se likolohang ka tsela *ena*. Ka ‘na ka se shebella. Ka bona lefatše le likolohang le bile le likoloha. Ka le shebella, ‘me ho lona ho ntse ho hafatsoa ho hong. Ka talima, ‘me keha ho hafatsoa bofubeli, Mali a krimson, hohle, ho potoloha lefatše; setsokotsane se likolohang, ekare mochochonono, keha le likiloe ke mophula oa setsokotsane ka tsela *ena*. Eba ke sheba setsokotsane sena. ‘Me ka holima sona feela, ka bona Jesu ponong. O ne a nyaretse fatše. Eaba ke ipona ke eme mona holima lefatše, ke etsa lintho tseo ke sa lokelang ho li etsa. Nako le nako ha ke etsa sebe, Molimo o ka be o mpolaile, “Hoba, mohla le se jang, le lokela ho shoa mohlang oo.” ‘Me khalalelo ea Molimo le toka li qosa hoo, ‘me u no u tla tlameha ho shoa. Eaba ke talima mono. Ka ‘na ka pikitla mahlo a ka. Ka re, “Ha kea... Ha kea ka ka khaleha. Kea... Ke pono. Ke tiile hore ena ke pono.”

<sup>187</sup> Ka ‘na ka sheba, ke sa eme ka mora monyako. Eaba ke bona ho nyoloha libe tsa ka. ‘Me enereha li qala li tloha li thula Terone, Mali a Hae a sebetsa eka bampara ea koloi. A li tšoare, ebe ke E bona e tsukutleha, ‘me Mali a phalle a theoha sefahlehong sa Hae. Ka Mo bona a phahamisa matsoho a Hae, le ho re, “Ntate, mo tšoarele, ha a tsebe seo a se etsang.”

<sup>188</sup> Ka ipona ke etsa ho hong hosele, e boele e Mo tsukutle, bampara. E ka be e etsahetse, Molimo o ka be o mpolaile hona moo, empa Mali a Hae a ne a ntšoara. A ne a thibela libe tsa ka. Ka nahana, “Oho Molimo, na ebe ke ‘na ea entseng hoo? Ruri e ne e se ‘na.” Empa e ne e le eona.

<sup>189</sup> Eaba ke tloha ke tsamaea ka mokhoa *ona*, eka ke parola phaposi eo, ‘me ka Mo atamela. Ka bona buka e robetseng mono, lebitso la ka le ngotsoe holima eona, ‘me mefuta eohle ea litlhaku tse ntšo li ngotsoe bophareng ba eona. Ka re, “Morena, ke kopa tsoarello ka ho etsa sena. Na ke libe tsa ka tse U etsitseng hoo? Na ke ‘na ea hafalitseng Mali a Hao pitokolohong ea lefatše? Na ke—na ke U entse sena, Morena? Ke kopa tsoarello ha ke entse hoo.” Eaba O nanabela joalo. Ka re, “Na ebe U tla ntšoarello? Ke ne ke sa ikemisetsa joalo. Ke tla... Uena, ka mohau oa Hao, ke tla leka ho fetoha moshanyana ea betere ha U ka nthusa feela.”

<sup>190</sup> A ntsoo ntšo letsoho la Hae le ho phathatsa lephako la Hae, ka monoana oa Hae ‘me oa ngola “lebaletsoe” holima puka ea ka; oa e lahlela ka morao ho Eèna, Leoatle la Tebalo. Ka e

shebella nakoana. 'Me A re, "Joale, kea U tšoarela, empa uena u batla ho mo ahlola." Ua bona? Ha thoe, "Uena u tšoaretsoe, empa ho thoeng ka eena? U batla ho mo phatlola. U ne u sa batle hore a phele."

<sup>191</sup> Ka nahana, "Oho Molimo, ntšoarele. Ke ne ke sa ikemisetsoa ho nahana hoo. Ke ne ke sa batle ho etsa hoo. Ke—ke—ke ne ke sa batle ho etsa hoo."

<sup>192</sup> "Uena u tšoaretsoe. U ikutloa monate. Empa u reng ka eèna? Le eèna o a e hloka, hape. U a e hloka."

<sup>193</sup> "Be," ka nahana, "Molimo, ke tseba kang eo U mo bitsitseng, le eo U sa kang ua mo bitsa?" Taba ea ka ke ho qoqa le e mong le e mong.

<sup>194</sup> Ka hona, hoba pono e ntlohele, ka mo atamela. Ka re, "U phela joang, leleiti?" 'Me banna ba babeli bao ba se ba ile ntloaneng. 'Me bao... O ne a lutse mono, a khitloa ke thaabe, u a tseba, a ntse a keketeha. Botlolo ea wiski e behiloe holima tafole, kapa biri, mono keha, ho behiloe alkohoholo, ba ntse ba enoa. Ka nyoloha. Ka re, "U phela joang?"

'Me a re, "Oh, hela bo."

'Me ka re, "Ebe nka lula fatše na?"

A re, "Oh, ke fumane motsoalle."

Ka re, "Ke ne ke sa rialo, khaitseli."

Eaba u a ncheba ha ke mo bitsa "khaitseli." A re, "U batla'ng?"

Ka re, "Na nka lula fatše motsotso feela."

A re, "U amohetsoe." Eaba ke lula fatše.

Ka 'molella se hlahileng. A re, "Lebitso la hao ke mang?"

'Me ka re, "Branham."

A re, "Ke uena monna ea tlase mona areneng?"

Ka re, "E, mofuma'li."

<sup>195</sup> A re, "Esale ke batlide ho theohela mono." A re, "Mongh. Branham, ke holetse lelapeng la Bokreste." A re, "Ke na le banana ba babeli ba Bakreste. Empa lintho tse itseng, ho hlahile lintho tse itseng," eaba o kena tseleng e phoso, kapa a qala.

<sup>196</sup> Ka re, "Empa, khaitseli, ha ke tsotelle, u sa ntse u potiloe ke Mali. Lefatše le khurumelitsoe ke Mali." Hola A sa etsa, Molimo o ka be o re bolaea, e mong le e mong. Oona... Mohla Mali ao a tlosoang, shebella kahlolo. Empa joale, ha u eshoa u se na Mali ao, u tšela sebaka seo, ha ho letho ho u sebeletsa. Kajeno Mali a u emetse. Ka re, "Leleiti, ehlide, Mali a sa ntse a u khurumelitse. Ha feela phefumolho e sa le teng 'meleng oa hao, Mali a u khurumelitse. Empa tsatsi le leng mohla phefumolho e tlohang mona, moea o a tloha, u tla tšeleta ka nqane ho Mali ao, 'me ha ho letho haese kahlolo. Ere u sa fumane monyeta oa teballo..." Eaba ke mo tšoara ka letsoho.

<sup>197</sup> O ne a lla, ha thoe, “Mongh. Branham, kea noa.”

<sup>198</sup> Ka re, “Hoo ha ho hlophe. Ntho e itseng, e ntlhokomelisitse ho tla u bolella.” Ka re, “Molimo, pele ho motheo oa lefatše, o u bitsitse, khaitseli. ’Me u etsa phoso, ’me u e mpefatsa le ho feta.”

<sup>199</sup> A re, “U nahana hore A ka nkamohela?”

<sup>200</sup> Ka re, “Ehlile, O tla u amohela.”

<sup>201</sup> Mono mangoleng a hae, ra khumama bohareng ba fuluru eo, ra tšoara tšebeletso ea mehla ea khale ea thapelo. Lepolesa leo la rola katiba ea lona la khumama ka lengole le le leng. Mono ra tšoara tšebeletso ea thapelo, sebakeng seo. Hobaneng? Molimo o ikemetse.

“A re lahleng mesebetsi e shoeleng ena, a re feteleng phethehong.”

<sup>202</sup> A re feteleng selikalikoeng seo moo lintho tsena, “Ke setho sa kereke; ke setho sa *hoane*,” hoo hohle ho felile. ’Me a re feteleng phethehong.

<sup>203</sup> Motsoalle oa ka oa moetsalibe, ha u se na Mali kajeno, u se na pholoso, u se na mohau, Mali a Jesu Kreste a u tšoere. U re, “Be, ke e phemme nako ena eohle.” Empa tsatsi le leng u tla ea moo ho seng letho le tla u emela.

A re rapeleng joale, re sa inamisa lihlooho tsa rōna.

<sup>204</sup> Na ekaba, ho ka ba teng, e mong mona kajeno ea ka ratang ho re, “Molimo nkauhele, kea elelloa esale ke fositse”? Ekaba u ingolisa le kereke. Hoo ho itoketse. Empa ha u eso amohele mohau oa Kreste, na u ka phahamisa letsoho la hao ho re, “Rapella, ’na, Moena Branham”? Molimo a u hlohonolofatse, mohlomphehi. Molimo a u hlohonolofatse, leleiti. Ke hantle. U se ke... Molimo a u hlohonolofatse, monghali, morao moo. Molimo a u hlohonolofatse, le uena. Motšeо koana ka morao, e, Molimo a u hlohonolofatse. Phahamisa letsoho la hao. Ke hantle. Ako phahamise letsoho la hao feela, ’me u re, “Molimo, nkauhele.”

<sup>205</sup> U re, “Ke setho sa kereke, Moena Branham. E, ke—ke ile ka leka ho itokisa, empa ha ke tsebe, ekare, ho bonahala, ha ke khone ho e finyella.” Oh, uena moeti oa batho, motsoalle oa batho ea tšeremang, ehlile le joale ha eso bone pono.

<sup>206</sup> U re, “Moena Branham, ke hooeletitse. Ke buile ka lipuo. Ke entse hona hohle.” Ekaba e nèpahetse, hape. Hoo ho itoketse, ha ho buuoe letho khahlano le hoo.

Empa, moratuoa oa ka, motsoalle ea lahlehileng, empa, ho bua ka lipuo, kapa ho tsukutleha, kapa ho tsukutla matsoho, kapa ho kolobetsoa, hoo, ho itoketse. Empa, ho Mo tseba, ke ho tseba Motho. “Ho Mo tseba ke Bophelo.”

<sup>207</sup> U re, “Ke tseba Bibele, hantle haholo.” Be, ho tseba Bibele, ha se Bophelo. “Ho Mo tseba,” leemeli la motho, “ho Mo tseba, Kreste,” ho tseba hobane O u tšoaretse.

Na u ka phahamisa matsoho a hao, hape, motho e mong hape? Molimo a u hlohonolofatse, leleiti. Molimo a u hlohonolofatse, monghali. Molimo a u hlohonolofatse ka mona, moena. Molimo a u hlohonolofatse morao mono, mohlankana. Molimo a u hlohonolofatse ka mona, khaitseli. Molimo a u hlohonolofatse, motšeо ka morao, mono. Ke hantle. “Ho Mo tseba, ke Bophelo.”

“Moena Branham, u nkhopole. ’Na hona joale, hantle mona setulong sa ka, ke tlil’o amohela Kreste.”

<sup>208</sup> Ho re, “Kena pelōng ea ka, Morena Jesu, le ho ’nea khotso eo, monate oo.” E-ea kerekeng, letsetsa ’mino holimo ka bokhoni ba hao, hobela u ee holimo-le-tlase, matha mocheng oa litulo; e-ea hae, touta, u phethohe, u phehe khang, ha se Kreste eo. U ea kerekeng, u a lula u mamela therōnyana e mabapi le kamoo borogo bo tla takoa, kapa ho hong, ntho e kang eo, ha u utloe Lentsoe le ka mohla. Lentsoe le hlahisa Bophelo. Ke Peo. Na ha u batle khotso?

<sup>209</sup> Na u tšoentsoe ke ho shoa? Hola u ka futuheloa ke pelo kajeno, ana e a u tšoenya? Kapa na u ka nyakalla, ho re, “Ke tla lula le Morena Jesu qetellong ea tsela ena”? Na u a Mo tseba? Ha u se joalo, ako phahamise letsoho la hao. Re tlil’o u hlahisetsa thapelo. E, moena, le uena, hape.

<sup>210</sup> Ho lokile, ka pelong ea hao joale.

Ke tla ke le feela, ke sa kope letho,  
Athe Mali a Hao a tšoletsoe (mang?) ’na,  
Hobane kea tšepisa, ke tla lumela,  
Oho Konyana, oho Konyana ea Molimo, kea  
tla. Kea tla, ka mosa, le ka bonolo.  
Ke tla...

Tsamaea feela u Mo atamele, ka tumelo. Lumela hobane O eme hantle mona lephakong la hao. O joalo.

...-ela letho  
Ho hlatsoa moea mè (ha kae joale?) se le  
seng... (mabifi, lonya),  
Ho Eo Mali a Hae a ka hlotsoang koli,  
Oho Konyana ...

<sup>211</sup> “Ka tumelo ke parola, hoseng hona. Ke siea meroalo ea ka. Kea tla.” Molimo a u hlohonolofatse morao mono. Ke botle. [Moena Branham o qala a binela *Ke Tla Ke Le Feel* ka marameng—Mong.] U se be monyēmo joale. Ka mofuthu, monate, tsamaea u parole.

<sup>212</sup> Ka hara Testamente ea Khale, ba ne ba tlisa konyana. Ba itsebile ba sitiloe, ba e tsebile ka melao. U a e tseba joale, hoba Molimo o buile le pelō ea hao. Ba ile ba sheba melao, “U se ke ua feba. U se ke ua etsa *hore-le-hore*.” Eaba ba nka konyana,

ba tloha ba beha matsoho a bona holima konyana, moprista a khaola qoqotho. Nthoana ea batho e ne e rahaka, e fopha mali, e lla, e shoa. Matsoho a hae ohle keha a netiloe ke mali. Konyana e mo shoetse, empa o ne a tsoa ka takatso eona eo ho boela a e phetha.

<sup>213</sup> Empa sebakeng sena, re tla ka tumelo, ka mohau. Molimo o re bitsitse. Re beha matsoho a rōna holima hlooho ea Konyana ea Molimo. Re utloa ho otla hoo ha noto. Re utloa Kolu eo, "Ke nyoriloe; Mpheng ke noe. Ntate, u se ke ua ba balla sebe sena; ha ba tsebe seo ba se etsang." Ua bona? Ka tumelo, re utloa lefu la Hae mono le etselitsoeng rōna. Tlase botebong ba pelō tsa rōna ho fihla, khotsa e tsetetsoeng e tebileng, ha Lentsoe le ne le re, "U lebaletsoe joale. E-ea u se hhole u etsa sebe." Joang, ka mohau, hape, re tloha re sa fupa takatso eona eo, empa ka takatso ea ho se etse sebe hape kapa ea ho etsa letho le phoso. Khotsa eo e hlolang kutloisiso eohle, e kene pelōng tsa rōna.

Le ke le E amohele joale re sa rapela, e mong le e mong, hammoho.

<sup>214</sup> Ntate oa Leholimo, ba tla ka tumelo, ka mohau. Ho batla ho phahame tosene ea matsoho. Ke litholoana tsa Molaetsa. Ba tla ho Uena. Ba lumela. Kea ba kholoa, hape, Morena. Ke lumela hoo, ehlide, Moea o Halalelang o buile le bona. 'Me ka tumelo ba nyoloha lere ea Jakobo joale, hantle maotong a sefapano, mono ba siee libe tsohle tsa bona, le ho re, "Morena, lia nkimela. Ha ke sa khona ho li jara. 'Me na U tla nkimolla moroalo oa sebe, le ho ntša takatso pelōng ea ka ho etsa hoo? 'Me ntumelle, ka tumelo, letsatsing lena, ho U amohela joaloka 'Moloki oa ka. 'Me ho tloha joale, ke tla U latēla meile o mong le o mong oa tsela, ho fihla qetellong ea leeto. Ke habanya se boleloang ke ho 'fetela phethehong,' ha se ho kena kahara kereke, le metso ea mesebetsi e shoeleng e kang likolobetso le lintho tse joalo. Empa ke batla ho tsoelapele, ho fihlala ke sa hhole ke le teng, 'me Kreste a ka phela ka ho 'na."

<sup>215</sup> Oho Jesu, hona ho abele moea o mong le o mong o sokolohang, hoseng hona. E mong le e mong ea phahamisang matsoho a bona o tla fumana Bophelo Bosafeleng hobane U e tsepisitse. Ba amohetse phatlalatsa. Ba phahamisa matsoho a bona. Ba robile melao eohle ea khohèli. Ba soabisitse mahlale, hobane mahlale a rialo, "Liphaka tsa hao li tlameha ho leketla." Ntho efe e pakela mahlale joalo, hore e tlameha ho koebetelloa fatše, hoba matla a khohèli a e hatèlla fatše. Empa moea o ka hare ho bona o entse qeto, 'me ba hanetse melao ea khoheli ba phahamisitse matsoho a bona. U e bone, Morena. U ngotse mabitso a bona Bukeng. "Lebaletsoe." Buka ea khale e khutletse kahara Leoatle la

Tebalo joale, li se hlole li hopoloa. Ba ke ba tlohe kajeno, ka lerato, e le Bakreste ba mosa, ho sebeletsa Uena. 'Me ekaba bongata ha bo a phahamisa letsoho la bona, ba abele hona hape.

<sup>216</sup> Bahalaleli ba tsamaele haufi ho feta, Morena, hoba re atametse Lapeng ka letsatsi le le leng ho feta maobane. Uena U be le rōna, Morena, hoba re e kopa ka Lebitso la Kreste le molemong oa khanya ea Hae. Amen.



### *BUKA EA BAHEBERU*

Melaetsa ena e leshome le motso o le mong ka Moena William Marrion Branham e reriloeng sethatong ka Senyesemane ho tloha ka Phato 21 ho haola ka Loetse 22, 1957, mane Tabernakele ea Branham, e Jeffersonville, Indiana, Amerika, e ntšitsoe mabanteng a likhatiso a makenete 'me e ngotsoe e sa khutsufatsoa ka Senyesemane. Phetolelo ena ea Sesotho sa Boroa e ngotsoe 'me e phatlalatsoa ke ba ha Voice Of God Recordings.

SOUTH SOTHO

©2015 VGR, ALL RIGHTS RESERVED

VOICE OF GOD RECORDINGS, SOUTH AFRICA OFFICE  
58 DISA ROAD, ADMIRAL'S PARK, GORDON'S BAY 7140 WESTERN CAPE  
REPUBLIC OF SOUTH AFRICA

VOICE OF GOD RECORDINGS  
P.O. Box 950, JEFFERSONVILLE, INDIANA 47131 U.S.A.  
[www.branham.org](http://www.branham.org)

## Temoso Ea Tokelo Ea Qopitso

Litokelo tsohle li babaletsoe. Buka ena e ka porintoa ka porintara ea lelapa molemong oa motho eo kapa ea abjoa, ntle ho tefiso, e le thepa e jalang Evangeli ea Jesu Kreste. Buka ena e ke ke ea rekisoa, ea boela ea hilahisoa ka bongata, ea manehoa leboteng la website, ea bolokoa ka tsela eo e ka boelang ea ntšoa, ea fetoleloa ka lipuo lisele, kapa ea sebelisoa ho qela matlole ntle le tumello e ngotsoeng ea Voice Of God Recordings®.

Ho fuoa boitsebiso bo bong kapa bakeng sa thepa e nngoe e ka fumanoang, ka kopo ikopanye le:

VOICE OF GOD RECORDINGS  
P.O. Box 950, JEFFERSONVILLE, INDIANA 47131 U.S.A.  
[www.branham.org](http://www.branham.org)